


APOCALYPSE, KAPU YA TANU

KITINI YA II

 . . . na kuvutuka na tabernacle na suka yayi, mpe samu na kupesa bansangu ya mbote ya bisika nyonso, mutindu ti Mfumu Nzambi me vwanda mbote samu na beto.

² Lumingu me luta ntangu vision kutubamaka, mpe mingi ya beno vwandaka awa (na yina me tala nyoka yina ba kufwaka na kati-kati): vision yina me salama mpova na mpova na kati ya bangunga makumi zole na yiya na manima ba tubaka yawu awa na estrade. Ya vwandaka kieleka mutindu Mfumu tubaka. Mu me monaka ntete ve mosi ya yawu kubwa na . . . na luzingu ya munu nyonso, mpe mu kele na bamvula makumi tanu na zole. Kieleka kaka, mpova na mpova mutindu ya me salama. Mpe mu ke na kuwa mbote mingi, mbote mingi.

³ Mpe ntangu yayi ya kele nyonso yina mu vwandaka zonzila, na kutubaka na yina me tala kufunda yina. To, kufunda ve, ya katukaka na bantima ya bantu kele ya kusungama, bayina ke zitisaka Nzambi, yina ministele ya munu vwanda me kuma kaka mwa kim- . . . kimpeve mingi, mpe bawu bandaka na kubanza ti mu vwandaka Mfumu Yesu, mpe ya kele sa- . . . bandaka mwa malongi ya fyoti na zulu ya yawu. Kasi na mbala mosi ya vwandaka nyonso vwandaka ya kutelema. Matondo na Mfumu samu na yawu!

⁴ Mpe kaka na ntangu mu basikaka na yawu munu mosi mpe me bika ti Mfumu kubaka yawu mpe me pesa yawu na Mfumu, na nswalu-nswalu ya sukaka, na kati ya bangunga makumi zole na yiya nyonso kusukaka. Ya bikaka munu ya kudasuka fyoti mpe ya kunyonga mingi fyoti, kasi mu ke basika na yawu na manima ya mwa ntangu fyoti. Samu ti ya vwandaka mutindu kubula mosi samu na munu, kasi mu kele ntangu yayi kieleka mbote.

⁵ Mpe beto vwanda me kuzwa balunungu ya nene sabala yayi, mu zola kutuba kima mosi.

⁶ Ntangu yayi, kana mu lendaka kuwa yina Mfumu tubaka na munu, ya zolaka salamaka ata mbala mosi ve. Bamvula yiya me luta Yandi tubaka na munu. Mpe kento ya munu yina kele awa, na kati ya bantu na manima awa kisika mosi ntangu yayi, mpe mwana ya munu ya bakala ya kuvwanda . . . vwanda awa na estrade mwa ntangu fyoti me luta, mpe banyankaka mingi yina kuwaka munu kutuba bilumbu na manima ya bilumbu, “Yayi kele mbala ya nsuka mu ke sadila mosi ya kuswasikisa mabanza yina.” Beno me mona? Ya kumaka kieleka . . . Mu mekaka na kuzinga kieleka pene na Nzambi, na kusalaka mutindu yina,

mpe yina ke basisa kima mutindu yina ke nata bantu na mutindu ya kubaluka mosi tii bawu ke zaba dyaka ve yinki ya kubanza.

⁷ Mpe dyaka, na dyambu ya mpaku yina beto kuzwaka, ya zolaka vwanda ve na dyambu mosi samu na yawu kana mu kuwaka kaka Mfumu. Ya kele ntangu nyonso kisika mu ke salaka . . .kisika mu ke tumamaka ve na Yandi ya kele kisika mu ke kotaka ntangu nyonso na mpasi. Kana mu kuwaka kaka mbote mpe tambulaka na Yandi!

⁸ Mpe na yina ya ke kumaka . . .Ministele bantangu yankaka ke kumaka mingi ya kimpeve ti mu ke . . .Mu vwandaka na boma ti mu ke baluka na nzila yankaka yina. Kasi, ntangu yayi, mu zola ve kutuba . . .Mu zola . . .muntu nyonso, kusimba yayi mbote, ti mu zola ve kutuba ti mu ke na kukwenda ntama, ke kwenda ntama na Mfumu, kasi mu zola dyaka ve kusala kima mosi ya kimpeve, beno me mona, na yawu mutindu kuswasikisa mabanza mpe—mpe bima ya mutindu yina.

⁹ Ntangu yayi, Mfumu me vwanda na lemvo na beto na kati ya ntangu yayi; Yandi me telemisa Mpangi Neville, yina kele na ndinga ya profesi; Yandi kele na Mpangi Higginbotham mpe mingi ya bampangi yankaka awa bayina kele kieleka . . .na nzila ya makabu ya kimpeve na kati ya dibuundu, ke na kusalaka bimangu.

¹⁰ Mpe beno bika kaka munu kupesa beno kimbangi. Ya vwandaka na Mpangi ya kento Opal Weaver, mu zaba ve kana yandi kele na beto awa na dibuundu na suka yayi to ve. Nge kele awa, Mpangi ya kento Opal? Ya lenda vwanda ti mu lenda mona yandi ve. Oh, mbote, bamvula mingi me luta yandi vwanda kufwa na cancer, mpe cancer yina vwandaka na kati ya baglande ya bakento mpe ya menaka tii na luketo ya yandi. Mpe bawu pesaka dyaka kaka yandi mpimpa yina samu na kuzinga, yandi vwandaka me lemba mingi. Mpe mu kwendaka mpe sambilaka samu na yandi, mpe vision kwizaka, mpe kieleka yandi belukaka. Mpe ya me vwanda pene ya bamvula kumi na tanu me luta. Yandi me kwiza mpe kele na kati-kati ya beto ya me kuma bamvula mingi.

¹¹ Kilumbu yankaka yina yandi kumaka na kisika yandi vwandaka . . .kuzwaka mpasi ya yimbi na laka mpe bandaka na kubasisa menga na laka. Ya lombamaka ti yandi kumona na nswalu-nswalu dokotolo. (Mpe ya kele ntangu mu vwandaka na Canada.) Mpe yandi bokilaka Mpangi Neville, mpe Mpangi Neville kwendaka mpe bakaka Mpangi ya beto ya bakala Higginbotham. Mu banza ve ti Mpangi Higginbotham kele awa, yandi lenda vwanda, na suka yayi. Mpangi Higginbotham vwandaka mosi ya ba-administrateur ya beto ya ntama, mpangi mosi ya bakala ya mbote. Yandi kele awa? Na yawu bawu kwendaka sambila samu na kento, mpe na yina bawu sambilaka samu na yandi . . .Yandi vwanda basika menga awa, mu zaba

ve, bilumbu yikwa, bilumbu zole to tatu, mpe yandi vwanda landilaka kaka na kulosa menga. Mpe Mpangi Neville sambilaka samu na yandi mpe yandi losaka ata mbala mosi ve ditonzi mosi ya menga. Ya kele kieleka.

¹² Mpe na manima yandi kuzwaka kuvimba zole, ba-urticaire to nyonso yina ya kele na zulu na kati ya yinwa, mutindu ba-ampoule to nyonso yina ya kele vwandaka ya kulelika na zulu na kati ya yinwa ya yandi; mutindu, bibuku ya nene. Mpe ya vwanda pemisa yandi ata fyoti ve, mpe ba vwandaka. . . Yandi tubaka, “Ba vwandaka na ntela pene ya nkumunu ya hickory.” Mpe ya vwandaka na yinwa ya yandi mwa ntangu fyoti, bilumbu. Mpe Mpangi Higginbotham. . . Mu ke lendaka ve na kutuba nkumbu yina ya Allemand kieleka mbote, Mpangi Rupert, nge lemvokila munu samu na yawu. Kasi na mutindu nyonso, mu. . . Mpe mu lenda kuzwa yayi kaka yimbi awa. To, ve, mu banza ti yandi—yandi kele na dikabu ya kutuba na bandinga mpe kutendula bandinga. Mpe yandi tentika diboko ya yandi, na ntangu yayi, na zulu ya kizizi ya yandi. Mpe yandi tubaka, “Mpangi Branham, mazono ve, nkokila yina lutaka ve, kasi na mbala mosi bisika yina kusimbanaka” na zulu na kati ya yinwa ya yandi. Na nswalu-nswalu!

¹³ Mpe badokotolo kwizaka, talaka na laka ya yandi, mpe nyonso, mpe bawu tubaka, “Yandi fwana kwenda na lupitalu samu ti yandi kele na cancer na laka.”

¹⁴ Na yawu beto. . . Ba nataka yandi na lupitalu. Mpe mu vwanda zaba mpe ve ti yandi vwandaka kuna tii ntangu mu kutanaka na pasteur ya beto ya mbote, Mpangi Neville, awa, mpe mu vwandaka na nzila ya munu na lupitalu mpe yandi tubaka na munu ti—ti yandi vwandaka kuna. Na yawu mu kwendaka mona yandi, mpe bakala ya yandi vwandaka ya kuvwanda kuna. Mpe badokotolo tanu, yiya to tanu, kotaka mpe salaka bakizama ya yawu, bawu vwandaka ningisa bayintu ya bawu, na tubaka, “Ya, kieleka, ya kele cancer, virus ya cancer, ya kele cancer.”

¹⁵ Na yawu nterne kotaka mpe yandi bakaka fyoti ya yawu. Yandi tubaka, “Ti, kukondwa ntembe, ya kele cancer.”

¹⁶ Mpe mu tubaka, “Kasi, mpangi ya kento, kana Nzambi belusaka nge mbala mosi na cancer. . . ti ya vwanda nyonso yina ya lendaka vwanda. Ya lenda vwanda ti bantu yayi kele na kyeta ve. Bawu kele—bawu kele bantu ya kulonguka na bilanga yina na kutuba kana ya kele cancer to ya ke talana mutindu cancer to yina nyonso ya kele. Ya kele. . . Bawu kele bantu ya kulonguka samu na lukanu yina. Mpe ya ke talana mutindu cancer na yawu bawu ke na kutuba ti ya kele cancer.” Mpe mu ke tuba, “Kukondwa ntembe ya kele.”

¹⁷ Kasi yandi vwanda zola ve kukwikila ti ya vwandaka cancer. Na yawu, mu tubaka, “Kasi kana Nzambi lendaka—lendaka pesa mvutu na kisambu kuna samu na kusukisa kubasika menga;

Nzambi lenda pesa mvutu na kisambu, na kubasisa bima yina ya nene na yinwa ya nge. Ti ya vwanda nyonso yina ya lenda vwanda, Nzambi lenda sukisa kaka yawu ve awa?”

18 Yandi tubaka, “Amen!” Mpe bakala ya yandi vwandaka ya kuvwanda kuna. Mpe yandi tubaka, “Yawu yina mu ke tula ntima na ntangu yayi, ti Nzambi ke sukisa yawu.”

19 Mpe mu sambilaka samu na yandi. Mpe bawu kwizaka baka fyoti ya yawu samu na kusala kizama, mpe ya pesaka “kima ve” na yina bawu nyonso tubaka ti ya vwandaka *cancer*. Beno me mona?

20 Na yawu kima kele, bankundi, ti Yandi kele Nzambi mpe ti Yandi ke pesaka bamvutu na bisambu. Mpe beto kele na kyese mingi ti Yandi kwizaka tala beto awa na mwa tabernacle yayi ya kukikulumusa. Ya kele na kima ve yina lenda benda meso ya bantu, ya kele mabaya ya fyoti ya ntama yina beto me vukisa awa, bamvula mingi me luta, samu na kiswamunu ya bayintu ya beto, muludi na zulu ya bayintu ya beto, mu zolaka tuba, samu na bamvula mpe mvula ya mpembe mpe nyonso yina. Kasi bantu mingi ke na kuzinga bubu yayi samu na ngolo yayi, mpe samu na yina beto ke vutula matondo mingi.

21 Beto ke vutula matondo samu na ba-administrateur ya beto. Beto ke vutula matondo samu na ba-diacre ya beto. Beto ke vutula matondo samu na dibuundu ya beto. Mpe beto ke vutula matondo samu na pasteur ya beto. Beto ke vutula matondo samu na dikabu nyonso yina Yandi me pesa na kati ya dibuundu. Mpe beto ke sambila ti Yandi ke pesa bantu yayi lubakusu, ti bawu ata mbala mosi ve ke kwenda na lweka ya yimbi kasi ke vwanda kaka mbala mosi na kati-kati ya nzila na Yawu. Beno vwanda ata mbala mosi ve na lunangu to nyonso; ntangu beno ke sala yawu, kaka kuna yimeni samu na beno, beno me mona. Beno vwanda kaka ya kukikulumusa na Yawu.

22 Mpe beno mona, ntangu yayi, na yina bantu ke kwiza, bambevo mpe bantu ya mpasi, samu ba sambila samu na bawu na yina mu ke na kupemaka ntangu yayi mu banza mvula mosi to zole, na yina Nzambi me sala nzila samu na kukeba na bawu na yina mu ke na kupema fyoti. Beno me mona? Oh, ya kele matondo ve? Ya fwana . . . Beto zolaka vutula matondo ve samu na yawu? Nzambi ata mbala mosi ve ke bikaka Yandi mosi kukondwa kimbangi, mpe na yawu beto kele na kyese mingi samu na yawu.

23 Ntangu yayi, sabala yayi ke na kwiza, kana Mfumu zola, mu zola nata mwa bana ya munu ya bakento bayina me manisa kaka na lukolo samu na mwa konze ya bawu ya lukolo, na yawu mu ke sambila ti beno ke sambila samu na beto. Mwana ya munu ya kento ya kuluntu, yina kele na lukolo ya kitezo ya zole, yandi ke zola kumona kisika Paul Revere kutambula na mpunda ya yandi na kati-kati ya mpimpa, kisika yandi bikaka dibuundu kuna.

Mpe beto . . . Ya kele kaka awa na Nouvelle Angleterre mpe beto zola kukwenda mpe kumona yawu.

²⁴ Na manima, mu ke zolaka ntangu nyonso kumona Old Ironsides. Bantu yikwa me tangaka powesi *Old Ironsides*? Ya kele yina mu ke zolaka mingi na kati ya nyonso yina mu zaba; na ngaanda ya Muklisto, ya kele samu munu ya kulutila. Mu kaka . . . Mu ke banda na kutanga yawu mpe mu ke yituka mpe ke vwanda na yisi, ke tambula na ziunga, ke vutuka. Wapi mutindu na manima nge lendaka na kudyamisa yawu . . . Ya kele kaka mutindu kubaka mpunda mpe kufwa yandi na manima yandi me sala luzingu samu na beno mpe dibuta ya beno. Mu kaka—mu ke mona kaka yawu ve. “Na yawu mu ke kufwa yawu!” Ve, kusala yawu ve. Ntangu kubula ya bikubudi ya ba-Britannique kututaka yawu mpe kuwakanaka na balweka ya yawu ya ntama ya kambala, mu—mu zola mona nge ve kukatula yawu mpe kudyamisa yandi.

Kupesa yandi na banzambi ya kitembo,
Banzasi mpe mupepe ya ngolo!

Kieleka mu zola yawu.

²⁵ Mpe na manima beto zola kukulumuka, mpe Tata Kennedy me bokila beto ve, kasi beto zola kumona Yinzò ya Mpeembe na yina beto kele kuna. Bawu . . . mu me vwandaka na kati ya yawu bambala mingi kasi bana ke zola kumona yawu. Na manima beto ke vutuka na yinzò, kana Mfumu zola. Na yawu beno sambila samu na beto.

²⁶ Mpe beto ke sambila samu na bampangi ya beto nyonso ya luzolo awa bayina kele na konze, mingi ya bawu me sala banzyetolo ya bawu na bisika mingi. Mpe bayankaka ya bawu me kwenda na suka yayi, kuna na Kentucky mpe Tennessee mpe bisika yankaka. Na yawu beto ke sambila samu na bawu.

²⁷ Ntangu yayi, ya vwandaka na kima yankaka mu vwanda zola kupesa nsangu. Oh, inga, lukutakanu ya kubotika kele na manima ya lukutakanu yayi. Mpe na manima—na manima mu banza ya ke vwanda na lusakumunu ya ba-bebe, mpangi ya bakala vwanda tubila munu na yawu, lusakumunu ya ba-bebe. Mpe bima mingi ti beto fwana ba- . . . Yinki nge ke tuba? [Mpangi mosi ya bakala me yufula Mpangi Branham samu na lukutakanu ya nkokila—Mu.] Mbote, mu ke na kutala ve kubaka balukutakanu zole. Beno me mona, mu ke baka mosi mpe Mpangi Neville ke baka yankaka. Mpe mu lenda ve . . . Ya kele ve . . . Ntangu beto zole kele awa, samu na yinki kusadisa mosi tii kulemba? Ya kele kieleka ve, Mpangi Neville? Ya kele kaka kieleka.

²⁸ Mpe, dyaka, Doc tubaka na munu na ku- . . . na kuzabisa beno nyonso na kubambuka moyo na yawu, baluka ya beno na zulu ya tabernacle, ti—ti dibuundu . . . ti bawu ke na kutalaka na

kutunga ntangu kaka bawu ke kuzwa mbongo ya kulunga samu na dibuundu.

²⁹ Mpe na yawu mu—mu wandaka. . . Ya monanaka na munu mutindu ti ya wandaka na kima mosi, ya zolaka vwanda ntangu nge me tuba na munu na yina me tadila yawu, mbyadisulu ya ba-bebe. Ya kele yina ya wandaka. Mpe beto ke kuzwa yawu na nswalu-nswalu na manima beto me manisa na lukutakanu yayi awa.

³⁰ Ntangu yayi, yayi kele samu ba sambila, bilele yayi, mu banza? Mbote mingi, tata. Beto ke sala yawu kintwadi, mpe kuna. . .

³¹ Ntangu yayi, ntete beto belama na Ndinga. . . Bantu yikwa ke sepela na Ndinga? Oh, la la, kuzinga na zulu ya mongo! Beno tala, beno—beno lenda mona kubanda Lumingu me luta yinki ya zola kutuba kusala yawu mutindu ya Nzambi. Beno me mona? Ntangu mu monaka ti ya wandaka mpeve yina wandaka me kota na kati-kati ya bampangi yayi ya ntalu, ya wandaka ve na mutindu mosi samu samu na muntu ya kimuntu na kukatula yawu. Na yawu kima kaka beto zolaka sala vwanda kubyadisa yawu to kupesa yawu na Mfumu, mpe na bangunga fyoti yawu nyonso kusukaka.

³² Ntangu yayi, pasteur (mpe munu na kukwenda ntama), na kuvwandaka mpangi ya nge yina ke salaka na nge na kusalu ya Mfumu awa, mpe mutindu Paul ke tuba, “Mu ke tuba na nge na ntuala ya Nzambi mpe bawanzio yina ba soolaka,” beno me mona. Mpe na dibuundu yayi awa, ya kele na kifwani mosi ya kulunga na yina ya kusala kana muntu basika na balutumumu ya dibuundu. Beno me mona?

³³ Ntangu yayi, kana kima salama na dibuundu yina kele ya kusunagama ve, na yina ti muntu, yina zaba ti ya kele ve ya kusungama, kukwenda na muntu yina. Mpe kana muntu yina zola ve kuvutu ngwisani; kuna kima ke landa na kusala kele kubaka mbangi mpe kukwenda, to ya lenda vwanda bambangi mosi to zole, mpe kukwenda na muntu yayi samu na kuvutula ngwisani na yandi to kusungika kima mosi. Ntangu yayi, beno kuwa mbote! Awa, yayi ke na kubakamaka na bande, mpe. Mpe kuna kana yina simba ve. . .

³⁴ Beno bika ata mbala mosi ve mwa isme, to mwa kima yankaka, mwa nsatu ya yimbi kubasika na kati-kati ya beno. Beno basisa kaka yawu ntangu yayi! Na yawu ya kele fyoti. . . Ya kele mubaku ya fyoti ke bebisaka bambuma ya vinu, beno zaba. Na yawu beno basisa yawu na nzila! Kana beno kuwa na nzutu mwa kuseka mosi, beno kwenda tuba yawu na muntu yina. Beno tuba, “Mu kele—mu kele na kyeta. Mu—mu ke kuwa ve mbote samu na nge, to kima. Sadisa munu na kusambila samu na yawu, ti mu kuma mbote mingi.” Samu ti, beto zola kima ve kasi mpembe kaka, ya kindumba ve, Mpeve-Santu ya Nzambi na

kati-kati ya beto. Ya kele nyonso beto zola. Na yina makabu mpe nyonso ke sala kieleka mpe nyonso ke vwanda mbote.

³⁵ Samu na yinki ya kuzwa ndambu ya dibuundu na yina beno lenda kuzwa mosi ya muvimba? Samu na yinki kundima kima ke baka kisika na yina mazulu kele ya kifuluka na kima ya kieleka? Beno me mona? Beto zola yawu ve. Na yawu kana mwa kuwa mosi ya kuseka kukwiza na kati-kati ya beno bamambebe, mosi na yankaka, beno kwenda na muntu yina.

Beno ke tuba, “Mbote, bawu me sala munu . . .”

³⁶ Ti . . . ya kele . . . Ntangu yayi, beno bambuka moyo, ve “kana beno me sala foti to yimbi na mpangi mosi,” kasi “Kana mpangi kele na dyambu na *nge*.” Beno me mona? Beno kwenda na yandi mpe beno vutulaka kiwisa, beno tuba na yandi ti beno—ti beno me kuzwa kuwa mosi ya nzenza samu na yandi mpe ti beno zola kusala bumpangi, mpe beno sambila mpe beno kwenda na autel mpe beno basisa kima na kati ya beno.

³⁷ Ntangu yayi, Satana ntangu nyonso ke bula beno dikofi tii ntangu beno manisa awa na zulu ya ntoto. Beno bambuka kaka moyo na yawu. Beno ke kuzwa ata mbala mosi ve ntangu kasi yinki ya kele na dikofi ke luta ntangu nyonso, samu ti beno kele na kati ya mvita. Beno lombaka na kukwiza na Klisto, na kukwenda na piknike? Mbote, ya kieleka beno ke yituka, samu ti ya kele mvita ya ntangu nyonso. Mu kele na bilanga ya kulonga bamvula makumi tatu na mosi, mpe mu me nwana samu na konso kitini ya nzila. Ya kele ya kieleka. Israel zolaka nwana samu na konso kitini ya nzila. Bawu—bawu . . . Palestine kupesamaka na bawu, kasi bawu zolaka nwana samu na konso kitini ya nzila samu na kuzwa yawu.

³⁸ Ntangu yayi, beno bambuka moyo na yayi ntangu yayi, ti kana . . . Na yina kana ya kele na kima ke salama na dibuundu, kuna beno bika pasteur . . . mpe kana beno—kana beno fwana kwiza kuzwa pasteur, samu na kunata bawu na muntu yayi. Kuna kana bawu zola ve kuwa yawu, na yina kwiza na ntwala ya dibuundu mpe tuba yawu na ntwala ya dibuundu. Beno pesa bawu ntangu mingi samu na kuvutula ngwisani, ya lenda vwanda Lumingo mosi tii yankaka. Mpe kana bawu kuwa dibuundu ve, kuna Biblia ke tuba “Ti yandi vwanda mutindu mumpani mpe mufutisi-mpaku.”

³⁹ Samu ti, beno me mona, ntangu nyonso yina bawu ke kebama na dibuundu, Satana lenda simba bawu ve. Kasi ntangu dibuundu ke katula bawu na yisi ya nkebolo ya dibuundu mpe Menga ya Klisto, kuna Satana ke sala bawu kisalu. Yina ke vutula dyaka bawu na kuvutula ngwisani. Beno me mona? Beno—beno me bakula yawu, nge ve, pasteur? Yinga, tata.

⁴⁰ Na yawu ya kele ntangu nyonso kima ya kubambuka moyo na kusala, ya kele kuvutula ngwisani, beno kwiza na Nzambi mpe beno kwenda nzila ya Nzambi. Beto fwana . . .

41 Yinki ke talisa na beto? Zole to tatu ya bampangi ya beto yina me zaba ti mu me sala na yisi ya mosi yankaka yayi bamvula zole to tatu. Ya kele kieleka. Kasi ntangu mu vwanda kuma na kisika mu vwandaka banza kuvwanda bantu yina, mpe mu lendaka na nsuka kuzola bantu yina mingi samu ti bawu kukwenda ntama ve na yawu. Mpe mu bakaka bambangi kasi ya simbaka ve. Mu zolaka nata yawu na dibuundu. Mpe kuna na estrade Lumingu me luta, mu tubaka, “Mu zola dyaka ve kuwa yawu. Mu kele na kimpwanza na yawu. Mu me bika yawu na Nzambi, beno me mona, mpe me pesa yawu na Yandi.”

42 Mpe na nswalu-nswalu ya ke lakisa ti bantu yina kele ya kubokila. Ya . . . Ntangu yayi, kana bawu vwandaka ve, na yina bawu kumaka na kitumbu ya Masonuku. . . Mpe muntu yina lenda ve kundima kitumbu ya Masonuku, yandi ke dasuka yandi nyonso mpe ke pasuka, ya ke lakisa ti yandi kele ve ya kusungama na Nzambi. Kieleka! Kasi santu ya kieleka ya Nzambi ke vutula ngwisani na Nzambi na nzila ya Ndinga. Ya kele kieleka. Mpe Ndinga kele mutindu ya kusemba. Bampangi yina fwana vutula matondo mingi na Nzambi ti . . .

43 Beno me mona, Biblia ke tuba ti “Baklisto ya luvunu ke telama na bilumbu ya nsuka mpe ke vuna bantu ya kieleka ya kusolama kana ya lendaka salama.” Kasi ya lenda salama ve. Ve, tata. Musolami kutumamaka na ntwala, na yawu bawu ke vunama ve, beno me mona.

44 Na yawu ntangu bampangi yina. . . Bawu kwizaka kuna na yinzo kilumbu yina landaka, beno me mona, mpe tii bawu kwizaka mpe bawu bandaka na kupesa munu Masonuku ya bawu. Mpe kuna Mpeve-Santu na nzila ya Masonuku bedisaka kaka nyonso yina bawu vwandaka tuba. Beno me mona? Na yawu kuna ya vwandaka, bawu monaka, nkonga ya bantu ba soolaka kotaka na Mvwandulu ya Nzambi. Ya ke sala munu kuvutula matondo samu na bantu ya mutindu yina. Yinga, tata. Ya kele bantu ya kieleka.

45 Ntangu beno ke mona muntu yina kele na foti, mpe ya me siamisama foti, na manima yina ke lakisa ti yandi zola kuvwanda Muklisto, yandi ke belama mpe ke tuba, “Mu kele na foti.” Ya kele—ya kele Muklisto ya kieleka.

46 Kasi muntu yina ke pasuka nyonso, mpe ke kwenda mbangu bisika nyonso na lweka mosi mpe ke tuba, “O, ya vwandaka ve na kima na Yawu,” mpe mutindu yayi; beno sala keba, mpangi, beno lenda mona kaka kuna ti yandi me kubwa na yisi ya kitumbu samu ti yandi vwandaka ve ya beto. Kasi ntangu nyonso, pasteur, beno kwiza na Ndinga yina mpe Yawu ke sala yawu konso ntangu. Kasi beno fwana kuvwanda na Ndinga.

47 Ya kele samu na yina ntangu mu ke kwizaka, ntangu yayi, mu me . . . mu ke salaka dyaka ve kumona mabanza na—na Etats-Unis, mu ke kanisa ata fyoti ve, na luzingu ya munu me bikana,

kaka na basimu yankaka mpe na bilanga ya kulonga na bayinsi ya nzenza mpe nyonso. Samu, mutindu dikabu, mutindu dikabu ya profesu, ya ke vwanda kuna ntangu nyonso, kasi mu ke bumba yawu samu na munu mosi mpe mu ke sadila yawu kaka samu ti ya kele. . . beto kele—beto kele ntama mingi na kilumbu bubu yayi samu ti. . . ya kwenda na ntuala. Beto me belama mingi na nsuka ya ntangu. Kasi na bilanga ya nzenza ya kele kaka samu na dyambu mosi to zole na estrade mpe, mpangi, mu zola tuba bawu me kwenda.

⁴⁸ Na yina beto ke kuzwa bilanda-landa ya nsuni ya Yawu. Oh, la la! Ya kele kaka kyadi. Beno tala, mu zola. . . Bantu yikwa ya Pentecote kele na kati awa? Beno telemisa diboko ya beno. Mbote mingi. Beno tala, beno bantu ya Pentecote, bamvula fyoti me luta kieleka Nzambi kubwaka na zulu ya beno mpe beno bandaka na kuzonza na bandinga. Ya kele kieleka. Kasi yinki dyabulu me sala? Yandi me belama mpe me pesa bilanda-landa ya nsuni na yawu. Yandi me sala kima yina vwandaka mbote ve, me nata bantu na kuzonza na bandinga, mpe kusala bawu kutuba bampova mosi mpe bima samu na kusala bawu kuzonza bandinga, mpe nyonso yina; mpe bakala ke zinga na kento ya bakala yankaka, mpe mitindu nyonso ya bima, mpe nyonso yankaka, bayankaka ya bawu ke kunwa, ke kunwa fumu, mpe nyonso, ke landila na kuzonza na bandinga. Samu na yinki yandi ke sala yawu? Samu na kusala mpungi ya kieleka kupesa muningu ya mbote ve na bantu. Na yina nani lenda kubama yandi mosi samu na mvita? Beno me mona?

⁴⁹ Na yina ntangu yayi me salama. . . Ntangu yayi, beto kuzwaka bantu na dibuundu. . . Ya kele na mosi kaka. . . yina kwendaka kaka na manima ya munu kuna na Canada ata. . . Oh, bisadi bwilaka yandi samu ti yandi vwandaka homosexual. Beno me mona? Yandi tubaka, “Oh, Nzambi me pesa munu dikabu ya kuswasikisa mabanza.” Yandi tubaka, “Alleluia, mu me. . .” Yandi tubaka, “Ntangu yayi, Mfumu me tuba na munu ti muntu mosi awa na nkumbu ‘Jean. . .’”

⁵⁰ Beto kuzwaka mwa kento mosi awa na suka mosi, yina kwizaka na manima kuna, beno ke bambuka moyo, yandi kwizaka na manima kuna mpe yandi tubaka, “Mfumu me pesa munu mutindu mosi ya dikabu.”

Mpe mu tubaka, “Mbote?”

Yandi tubaka, “Mu ke zola kuzwa siansi ya kusiamisa yawu.”

Mu tubaka, “Estrade yawu yayi.”

⁵¹ Mpe beno monaka yina salamaka; psychologie ya muvimba ya kieleka, beno me mona. Kasi ntangu beno monaka, Mpangi ya kento Snyder me belama, mpe tubaka na yandi ti yandi vwandaka na “arthritis,” yina—yina—yina manisaka yawu. Ntangu Mpangi ya kento Snyder. . .

⁵² Na yina mu tubaka, “Yawu yina ve yina ke tambula ve mbote na kento yayi.” Mu tubaka, “Yandi kubwaka mpe pasulaka luketo ya yandi.” Mpe mu tubaka, “Yandi ke kaka ya kutelema kuna ve. . .” Samu ti Mpangi ya kento Snyder kuwaka ve mbote, mpe yandi tubaka. . . Mpe yina vwandaka na yandi, mu banza, vwandaka kivimbu na kifundu ya yandi to kima mosi yankaka ya yimbi mutindu yina. Mu tubaka, “Yawu yina; yandi kele ya kuvwanda awa ke zonzaka yawu na bampangi ntangu nyonso.” Beno me mona?

⁵³ Kasi ya ke kaka—kaka samu na kulakisa ti dibuundu, beno me mona, ti ya kele bilanda-landa ya nsuni, beno me mona. Mpe yinki yawu ke sala? Ya ke salaka mpungi ya kieleka. . .

⁵⁴ Ntangu yayi, ntangu mu vwandaka na Canada ba bakaka muntu yayi yina kwendaka kuna. Mpe tubaka (kaka na kati ya nkonga ya bantu ya Norvege), mpe yandi tubaka, “Mfumu me tuba na munu ti muntu mosi awa. . .” nkonga ya bantu pene-pene na yayi bambala kumi nene, “muntu na nkumbu ya ‘John,’ mu banza ‘Johannes,’ ‘Johann.’” Yandi tubaka, “Kaka awa, mu banza.” Yandi tubaka, “Ve,” yandi tubaka, “ya kele kaka awa kisika mosi”; samu ti, yandi bakaka ya muvimba. . . Na yinsi ya Norvege? Mpe muntu nyonso lendaka kuzwa. . . Makumi yivwa na zulu ya nkama na bawu kele Petersons, Carlsons, John, Johannes, mpe, oh, kieleka. Beno me mona, yandi kele kieleka. . . Ya fwana kota kuna kisika mosi. Na manima, “Mfumu me tuba na munu ti muntu mosi kele na mpasi na mukongo, mu ke na kuwa mpasi na mukongo ya munu.” Muntu nyonso yina ba me yindula na nzila ya Masonuku zaba ti ya kele psychologie. Ya kele. . . Kieleka, ya kele.

⁵⁵ Kasi, beno me mona, yinki salaka yawu? (Na yina muntu yina ba bakaka kaka yandi kuna na FBI awa, yina fidisaka kuna Gendarmerie Royale Canadienne, na kubwila yandi kuna.) Mpe kimvuka ya milongi kwizaka na munu, mpe, “Homosexuel,” bawu tubaka, “mbote, Mpangi Branham kele kukondwa ntembe kima mosi. Ya kele kaka mutindu ya ke tambulaka, beno me mona.” Yinki ya ke na kusalaka? Samu na kupesa mpungi muningu ya mbote ve. Beno me mona? Kaka kieleka. Ya kele mutindu ya kele ntangu nyonso, kumeka kusala bima mutindu yina samu na kupesa muningu ya mbote ve. Yina kele kusalu ya Satana na kusala yawu.

⁵⁶ Kasi, ntangu yayi, beno soba ata mbala mosi ve na Ndinga yina. Beno bambuka moyo, mu ke tuba na beno na ntwala ya Nzambi: *Beno vwanda na Ndinga yina!* Beno soba ata mbala mosi ve na Yawu. Mpe kana bima yina kutelama na kati-kati ya bantu mpe bima mutindu yina, ya kele na kieleka ntangu nyonso beno ke kuzwa luvunu. Ya kele na—ya kele na dollar ya luvunu, ya ke lakisa ti ya vwandaka na dollar ya mbote yina ba salaka. Ntangu beno ke kuwa muntu ya luvunu kuzonza na bandinga, beno lenda tuba ve ti yandi kele na Mpeve-Santu. Kasi, beno

bambuka moyo, yandi ke na kulanda kima ya kieleka yina ke na dikabu ya kuzonza bandinga. Ntangu beno ke mona bima yina yina kele luvunu, beno bambuka moyo, ba salaka yawu na mosi ya kieleka. Nzambi kele kisina ya bima nyonso ya mbote, kasi Satana ke landaka makabu yina. Mbote, kana mu landila na yawu, beto ke kota ve na lesu ya beto, mutindu yina?

⁵⁷ [Mpangi Ben Bryant me tuba, “Mpangi Branham, lemvokila kaka munu mwa fyoti?”—Mu.]

Yinga, mpangi ya bakala.

[“Lemvokila? Mu vwandaka ve awa Lumingu me luta, mpe mu me kuwa mupepe ya yina nge vwandaka zonzila bangonda fyoti me luta, mpe mu vwandaka kieleka ya kukwamisa samu na yawu, mwa fyoti, mpe mu kwa nsatu ya kukwiza mpe kuzonzila nge yawu mpe kutuba na Mpangi Neville. Kasi mu kuwaka nsatu mpe ti nge ke zaba kento ya munu na munu salaka yawu dyambu ya kisambu. Mpe na suka yayi ntangu mu me kwiza na tabernacle, mu vwanda zaba ve yina salamaka, mpe mosi ya bampangi ya ntalu kwizaka na munu na suka yayi mpe lombaka munu na kulemvokila yandi. Mpe mu banza ti ya vwandaka Mpeve mutindu Klisto.”]

Amen.

[“Mpe mu banza ti ya kele kieleka kima ya mbote samu na mpangi ya bakala yayi.”]

Yinga, tata.

[“Yandi lombaka munu na kulemvokila yandi, samu ti yandi vwanda meka na . . .yandi vwanda—yandi vwanda meka na kunata malongi yina na munu.”]

Yinga.

[“Mpe mu zolaka ve kundima yawu. Mpe yandi lombaka munu na kulemvokila yandi na suka yayi, mpe mu lemvokilaka yandi na Nkumbu ya Yesu.”]

⁵⁸ Amen. Matondo na nge, Mpangi Ben Bryant. Ntangu yayi, ya kele—ya kele kieleka . . .Mu kele na kyese nge me tuba yawu, Mpangi Ben. Beno me mona, samu ti bantu yina me vwanda bisika nyonso samu na kusungika. Ntangu yayi, ya kele kieleka Buklisto. Ya kele Buklisto na kusalu. Ntangu beno kele na foti, beno kwenda mpe beno ndima beno kele na foti. Beno me mona? Beno telama mpe beno tuba, “Mu kele na foti, beno me mona, beno lemvokila munu.”

⁵⁹ Ntangu yayi, muntu yina ke meka na kubumba yawu na manima, kuna yandi kele na kima mosi yina yandi ke na kufika. Ve, tata, mu zola . . .Mutindu mwa dokotolo mosi awa yina . . . Beno me mona, yandi lenda ve . . .Yandi . . .Mu ke zola ve kutuba yawu na yandi, kasi, na mutindu nyonso, yandi vwandaka na mwa kima yina yandi vwandaka zola kusala, beno zaba. Mpe mu tubaka, “Oh, ve, Doc, nge lenda sumba Nzambi ve.” Mu

tubaka, “Nge fwana tula kaka yawu awa na zulu ya dibaya.” Ya kele kieleka, bika kaka yawu kukwenda mutindu yina. Ya kieleka, muntu yayi vwandaka ya kulunga yina zabaka kima ve na kumeka na kusala kima ya yimbi. Yandi kaka—yandi banzaka kaka ti ya ke vwanda mutindu ya mbote ti yandi lenda kuzwa kitini ya ntoto. Mpe yandi vwanda meka ve na kusala yawu yimbi, yandi vwanda meka na kusala yawu mbote. Kasi yandi zolaka kaka . . . Yandi tubaka, “Mu. . .” Yandi zabaka nzila mosi yina yandi lendaka kwenda, kuzwa muntu na kusala kima mosi yina ke sala muntu yayi kuvwanda ya kuyala awa. Beno sala ve yawu mutindu yina. Beno kwenda kaka mbala mosi. Beno me mona? Beno vwanda kaka na Ndinga, mpe kuna beno ke kuzwa yawu. Beno vwanda kaka na Ndinga! Nzambi sakumunaka yandi mpe salaka kima ya nene samu na yandi. Yinga, tata.

⁶⁰ Mbote mingi, beto kulumusa bayintu ya beto ntangu yayi samu na kusambila. Bantu yikwa ke zola ti ba bambuka moyo na bawu na kisambu? Mu zaba mama mosi ya kuvwanda awa na kiti ya bambevo yina ke zola mingi ti bawu bambuka moyo na yandi, mu kele na kivuvu. Mpe mpangi ya kento yayi awa, beno nyonso, beno tala bisika nyonso na kisika. Ntangu yayi, ti beto tula nyonso na lweka ntangu yayi mpe beno kota na bisambu. Ya kele samu na yina beto kele awa, na bamuniti makumi tatu na tanu, to baminuti makumi yiya ke landa, samu na kusambila.

⁶¹ Ntangu yayi, Mfumu, na yina beto me vwanda swi na ntwala ya Nge, na kutalaka ti Josué ya beto ya nene, Mpeve-Santu, Ntwadisi ya beto ya Kinzambi ya kilumbu yayi. . . mutindu Josué vwanisaka bantu swi na ntwala ya Moise mpe tubaka, “Beto kele na lenda ya kulutula samu na kubaka yinsi.” Samu yandi vwandaka tala, na ba-Amalécites to ba-Amoréen yina ve, kasi yandi vwandaka tala nsilulu ya Kinzambi yina pesamaka na Nzambi.

⁶² Mpe na kilumbu yayi ya mpasi mpe nkadulu yayi na yina yinza kele na kati, mpe na zulu ya saba yayi ya kitoko ya suka, beto ke vwanda swi na ntwala ya Nge, mpe ke tuba na kati-kati ya bilanda-landa nyonso, kulanda ya nsuni, na ntwala ya yimbi nyonso mpe bampeve yina me zimbana nzila, mutindu beto ke tala na Ndinga ya Nzambi mpe ke tuba ti beto kele ya kulutula minungi! Nzambi tubaka ti Yandi ke vwanda na Dibuundu yina ke vwanda ve kukondwa ditona to mifutu na Yawu, mpe beto zaba ti beto ke mona Dibuundu yina kilumbu. Mpe beto ke na kunwana mutindu bamambeke, na kukwikilaka ti beto kele bamambeke ya dibuundu yayi ya nene yina me butuka dyaka na Nzambi mpe Dibuundu na zulu ya kizizi ya ntoto bubu yayi, beto me belama kieleka na Nzambi na Nkumbu ya Mfumu Yesu.

⁶³ Mpe na yina beto me kwiza ya kulemvuka, beto ke lomba ti Nge katula na mabanza ya beto mpe na bantima ya beto bima nyonso ya yinza, bampasi nyonso ya luzingu mpe baboma, mpe ti

Nge, O Nzambi, ke tula beto na kitezo ya kisambu, ti beto lenda sambila Nge na nzila ya kuwa Ndinga ya Nge.

⁶⁴ Ntangu yayi, mutindu Jean, na lesa ya beto na suka yayi, dilaka mingi samu ti muntu ve vwandaka ya kulunga na kubaka Buku, mpe na kati ya bantima ya beto beto lenda dila na suka yayi, Mfumu, samu ti ya kele na mosi ve yina kele ya kulunga samu na kuzibula Buku yayi. Kasi mutindu kudila ya Jean vwandaka kaka samu na mwa ntangu fyoti, ntama ve ba bombaka yandi mpe Mwana ya dimeme kwizaka mpe bakaka Buku; O Mwana ya dimeme ya Nzambi, na suka yayi, kwiza mpe baka Buku mpe fungula Yawu samu na beto, Mfumu. Beto ke vingila Nge. Na kulemba ya beto beto ke vingila na kuvwanda. . . Pesa beto ngolo na nzila ya Mvwandulu ya Nge mpe na Ndinga ya Nge.

⁶⁵ Maboko mingi vwandaka me telama na Nge, O Mwana ya dimeme ya Nzambi. Beto zaba ti Nge zaba konso ntima, samu ti Nge zabaka balukanu ya bawu. Mpe Nge kele kaka Nzambi ya kulutila bubu yayi mutindu Nge vwandaka ntete. Mpe Nge ke vwanda ntangu nyonso mutindu mosi, samu ti Nge kele ya kulunga mpe ya kukondwa nsuka mpe Nge lenda soba ve. Mpe beto ke na kulomba na suka yayi ti Nge ke pesa beto mvutu, na ndombolo ya muntu nyonso. Pesa, Mfumu, ti bawu nyonso ke sepela na yina bawu ke bika kivinga yayi, ti bawu me vwanda na Ntwala ya Nzambi mpe me kwenda na nsatu ya bantima ya bawu. Mfumu, kuzimbana ve na kukotisa munu na lutangu yina, mpe. Samu ti mu me lombamba yawu na Nkumbu ya Yesu. Amen.

⁶⁶ Ntangu yayi, beto kota na Buku ya beto ya ntalu, na kulingilaka Mwana - dimeme kuzibula bidimbu, to kuzibula Buku samu na beto. Beto baka ntangu yayi, beto kele na kapu ya 5 ya Buku ya *Luzayikisu ya Yesu Klisto*.

⁶⁷ Ntangu yayi, samu na bankundi ya munu na bisika nyonso yankaka ya yinza bayina ke vwanda na kuwa yayi na nzila ya bande manietiki, na kati awa mu lenda tuba ti mu fwana zonga na malongi mpe nyonso yina yankaka samu na kusala yayi. Mpe muntu nyonso yina kele ve na malongi kele na ministele ve. Na yawu kana beno banza ve ti dibuundu ya beno fwana kuwa bande yayi, na yina samu na bawu beno bumba yawu. Kasi mu ke na kupesa kaka dibanza ya munu mosi mpe mitindu ya munu mosi ya kutala, luzayikisu ya munu mosi ya Ndinga ya Nzambi.

⁶⁸ Ntangu yayi, mwa bangonda me luta beto vutukaka mpe salaka lufulu. . . bilumbu fyoti me luta, mu zolaka tuba, beto kwendaka mpe salaka lufulu na kapu ya 4, kapu ya 3 tii ya 4. Mpe ntangu yayi, Lumingu me luta, beto salaka lufulu ya kapu ya 4 tii na ya 5. Mpe ntangu yayi, bubu yayi, beto zola kusala lufulu na ya 5 mpe kutula lufulu samu na ya 6 yina ke kwiza.

⁶⁹ Mpe bubu yayi ya kele lukanu ya munu na kutula na nzila Masonuku, samu ti mu banza na bilumbu ke kwiza na ntwala,

mu zaba ve ntangu ya ke vwanda, kasi kana Mfumu kukubika, kuzwa kilumbu mosi lukutakanu ya bilumbu sambwadi na tabernacle na zulu ya *Bidimbu Sambwadi*. Beto vwandaka me kuzwa Bansungi Sambwadi ya Dibuundu, ntangu yayi beto ke baka bankokila sambwadi ya bidimbu sambwadi ya mansweki ya Nzambi, na kuzibulaka kidimbu mosi konso nkokila tii ya ke sukisa Bidimbu Sambwadi. Ntangu yayi, mu zaba ve ntangu Mfumu ke kubika yawu, kasi, kana Yandi sala yawu, Mu ke tula kaka lufulu yawu na suka yayi.

⁷⁰ Mpe kukuma na banzila ya nsuka ya maso- . . . ndambu awa, to kitini mosi ya Masonuku, beto ke kotisa *Basabala Makumi Sambwadi Ya Daniel*. Mpe basabala tatu ya nsuka, kuvukisa yawu na Jubilé ya Pentecote yina ke kotisa bantu na . . . bidimbu ya nsuka, mpe na manima beto ke kubama samu Mwana-dimeme kuzibula bidimbu.

⁷¹ Mpe, beno bambuka moyo, bidimbu kele kima ya mansweki. Ba kangaka Buku mpe ya vwandaka na manima, ya vwandaka na bidimbu sambwadi yina vwandaka mpe ve ya kumonana na kati ya Buku. Bima yayi kele mpe ve ya kusonama na kati ya Biblia. Kasi, kana muntu ke pesa lutendulu ya yawu, ya fwana fwanana na Biblia nyonso. Mpe, oh, mu ke kwikila ti beno ke kuzwa lusakumunu na kati ya yawu, to mu banza ti beno ke kuzwa. Mu kele na kivuvu ti beno ke kuzwa.

⁷² Mu vwanda me kuzwa kaka mwa ntangu ya kulwata kazaka ya munu samu na kwiza awa na suka yayi, samu ti ya vwandaka . . . Mu vwandaka ya kuvwanda na kati kuna, vwandaka tanga, mpe Mpeve-Santu vwandaka fulusa munu kukondwa nsuka na bumbote ya Yandi. Mpe mu . . . Ntangu mu monaka yawu, mu banzaka, “Oh, kana mu lendaka tuba yawu kuna mutindu Nge ke na pesaka munu yawu awa, beto nyonso ke kuzwa ntangu ya kieleka.” Kasi, na mutindu nyonso, ntangu beno ke telama na ntwala ya bantu, na yina beno ke tala ve mutindu beno ke tala ntangu beno kele beno mosi na kisambu, to kima yankaka.

⁷³ Kasi, ntangu yayi, na kubanda dyaka na banzila ya ntete, beto ke tala . . . Ntangu yayi, samu na kusala lufulu kisika beto bikaka Lumingu me luta, beto ke tala awa ti Paul, na Ephésiens 1:13 mpe 14, tubaka na beto ti beto kele . . . kuzwaka lufutu ya mpulusu ya beto, lufutu ya mpulusu ya beto. Samu ti ya kele Mpeve-Santu yina kele lufutu ya mpulusu ya beto. Mpe yayi . . . Mwa basabala fyoti ya malongi yina ke landa ke vwanda nyonso ya kuvwanda na zulu ya mpulusu, beno me mona, na zulu ya mpulusu, na zulu ya kunungisama ve. Ve . . . Ya kele ya kuvwanda na zulu ya mpulusu; ve na zulu ya kisalu ya balombilu ya bisambu, kasi na zulu ya bayina ba *vulusaka*. Oh, difwa yina vwandaka ya kuzimbana to ba yibaka mpe yina ba vuluswaka dyaka samu na beto, mpe mutindu yawu nyonso kusalamaka

mpe mutindu Nzambi kubikaka ntete yawu kuna na ntwala ya yinza, mpe mutindu kieleka Dibuundu kele ya kukangama.

⁷⁴ Mu banza ti ya me kuma ntangu yina beto fwana zaba kisika beto me telama. Wapi mutindu beno lenda sala kima kana ti beno kuzwa lukwikilu na yina beno ke na kusalaka? Beno fwana vwanda na lukwikilu. Mpe yina kele lukanu ya munu na kusalaka yayi na dibuundu awa, ya kele na kupesa mikwikidi lukwikilu mpe kivuvu na yina ba ke na kutelemina, samu ti ya kele Ndinga ya Mfumu. Na yina ntangu nyonso na nzila ya Masonuku ya ke kangama ya kieleka kubanda Genèse na Apocalypse, na manima mpe na mantwala, mpe na zulu mpe na yisi, nzila kele ve samu na dyabulu na kukota kuna kisika mosi, na yina beno kele na kivuvu ya kulunga, beno me mona, beno zaba kisika beno kele ya kutelama.

⁷⁵ Kima mosi zola vwanda na mpangi ya beto ya kento awa yina kele na kiti ya bambevo, to ya lenda vwanda na bayankaka yina kele na kimbevo mpe kele na mpasi. Kana beno lenda kuzwa lubakusu ya kulunga ti “ya kele luzolo ya mbote ya Nzambi na kukumisa beno mbote,” ya kele ve na bampeve mingi ya yimbi na yinsi samu na kubumba beno ya kubela. Beno me mona? Ya kele kieleka, ntangu beno ke bakula ti ya kele luzolo ya mbote ya Nzambi na kukumisa beno mbote, ti Yandi salaka yawu samu na beno, mpe beno ke bakula kuna mutindu yina beno ke kwenda sala kima mosi.

⁷⁶ Ya kele mutindu yayi. Kana mu tuba na beno na ntima ya munu nyonso. . . Kana beno vwandaka na nsatu mpe vwanda kufwa na nzala, mpe ti beno vwandaka na kivuvu ya nene na munu mutindu muntu ya kieleka, mpe ti mu tubaka na beno kisika ya vwandaka na fundu ya ba-dollar, mutindu beno ke kuzwa yawu, wapi nzila beno ke kwenda, kieleka kisika ya kukwenda, mpe beno me bakula kieleka kisika mbongo kele. Beno me mona? Kuna beno ke banda kaka na kusepela kuna, mutindu kaka ti beno vwandaka na mbongo, kana beno ke kwikila munu.

⁷⁷ Na yawu, beno me mona, ntete beno kuzwa. . . kuwa mutindu yankaka to kima nyonso yankaka, beno lenda vwanda kaka mutindu mosi na kyese samu na kubeluka ya beno na kutubaka beno “me kuzwa yawu,” samu ti beno kele kieleka ya kundima ti beno me kuzwa yawu, samu ti beno me kuzwa kivuvu na Yandi yina silaka yawu na beno. Beno me mona? Beno me mona? Kivuvu ya beno—ya beno kele ti Yandi lenda vuna ve, mpe Yandi me tuba na beno kieleka kisika ya vwandaka, mpe na yina beno—beno me kuzwa kivuvu ti beno ke na kwenda, beno kele na yawu yimeni, samu ti yina kele lukwikilu ya beno yina kele lufutu ya mpulusu ya beno.

⁷⁸ Na nonzolo yankaka, beno ke na kumeka na kuvwanda ya kuvulusa na kimbevo, mpe lukwikilu ya beno kele kima yina ya

kusakumuna . . . to, mu zolaka tuba, ya kele lufutu ya kubeluka ya beno. Ntangu nyonso kima ke tuba na kati ya ntima ya beno, “Mu kele Mfumu yina ke belusa *nge*,” ya kele kaka mbote, ya kele kaka nyonso yina beno kele na nsatu. Ya kele . . . Oh, beno lenda banda kaka na kusepela, ata nyonso yina ke salama. Kana beno kuzwa yawu ve, kana beno kuma ya kubela mingi, beno kele kaka dyaka na kyese mutindu ti beno vwandaka, ti beno vwandaka kieleka mbote, samu ti beno kele na kivuvu yina ti ya me suka. Bantu yikwa ke bakula yawu ntangu yayi, ti beto tala diboko ya beno. Beno bawu yayi. “Ya kele kimbangi ya bima yina ke monana ve.”

⁷⁹ Ntangu yayi, beto ke tala ti na mbandukulu ya ntete ya kapu, ti beto ke tala ti nte- . . . kapu ya 5 kele kaka bloke ya kukangama, ya kele—ya kele dikolo ya diama yina ke kanga kitini ya nsuka ya nsungi ya Dibuundu, ya kapu ya 3. Kapu ya 4 ke tuba yina ba zangulaka Jean na Mazulu. Mpe kapu ya 5 kele kukubama samu na bayayi. . . Kisika beno kwendaka na nzila ya Bansungi Sambwadi ya Dibuundu, kuna ba me zangula Jean na kapu ya 4. Mpe kapu ya 5, yandi ke kubika kisika awa samu na kuzibula ya Bidimbu Sambwadi. Kaka mutindu yandi salaka na kapu ya Ntete ya Apocalypse, na kuzibulaka nzila samu na Bansungi Sambwadi ya Dibuundu (kuna Yandi me telama na kati ya minda sambwadi ya wolo, mpe Yandi ke tala mutindu Jaspe mpe ditadi ya Sardoine), mpe Yandi ke na kukubika samu na Bansungi Sambwadi ya Dibuundu.

⁸⁰ Ntangu yayi Yandi ke na kukubama samu na kuzibula ya Bidimbu Sambwadi yina ya mpulusu. Beno me mona, yawu yina kapu 5 kele. Ya kele samu na yina mu me meka na kutanga yawu mpe na manima kubaka kaka yawu kuna, mpe kuzonzila na yawu mpe kupesa bitini yankaka ya Masonuku; ya kele samu ti ya kele ve nzila na manima ya nzila, kima yina ke na kusalamaka, ya ke na kukubamaka samu na kima ke salama. Mpe kana beno me kubama, na yina beno fwana kaka . . . beno me kubama samu na yawu kuna. Mpe ya kele mutindu ya kele na nzila ya lukwikilu to kima nyonso yankaka. Ntangu yayi, yayi, bidimbu . . .

⁸¹ Mu kele na mwa Masonuku mpe mulabu mpe nyonso yankaka ya kusonika awa. Ntangu yayi, na Ephésiens 1:13-14, beto . . . kana beno ke zola kusonika yawu, ti, “Beto me kuzwa lufutu ntangu yayi. Mpeve-Santu kele lufutu ya difwa ya beto.” Na nzonzolo yankaka, Yawu kele kivuvu, *lufutu* kele “kivuvu,” “avanse,” ti ba me yamba beto na kati ya Klisto. Ya kele kivuvu ya kusakumuna mpe lufutu ti beto kele na Luzingu ya Seko mpe kele bibyadi ya nyonso yina Yandi futaka samu na beto. Oh, la la! Beno lenda mona yawu?

⁸² Oh, ntangu ba me kanga beto na Mpeve-Santu (mu ke na kulandila na kutanga yawu samu mu zola ve ti beno kondwa yawu), ya kele kidimbu ya Nzambi ya kusiamisa ti kima nyonso samu na yina Klisto kufwaka kele ya beto. Ya kele Nzambi ke

na kutuba, “Mu me yamba nge ntangu yayi, mpe Mu ke pesa nge Kidimbu yayi ti nge ke vingila kaka ntangu yina,” tii mpulusu ya beno ya muvimba, mpe yina kele samu ti beto me vuluswa ndambu yimeni.

⁸³ Mutindu mu tubaka Lumingu yankaka yina, mu banza ya vwandaka, na yisi *awa* na nzila ya yisi yayi kele kisika musumuki ke tambulaka: na poto-poto, mvindu, kubola, mvindu. Ntangu yayi, yandi... bawu lendaka vwanda mpembe mutindu... kuyobila konso bangunga yiya, bawu lendaka lwata bilele ya mbote mingi, bawu lendaka vwanda bantu ya mayele mingi; mpe ya mvindu mutindu bibaka ya nsoni na difelo, na kati ya moyo ya bawu. Beno me mona?

⁸⁴ Ntangu yayi, Muklisto ke zingaka na zulu ya yawu, samu ti yandi kele na lufutu ya difwa ya beto *awa*. Ba lokotaka yandi, basisaka yandi na kati ya mvindu mpe kubola; na zulu *awa*, mpe yandi ke tambula na zulu ya yawu na zulu ya mpunda. Oh, mu zola yawu! Mutindu Paul Rader kutubaka kilumbu yina na zulu ya yinti, beno zaba, yandi tubaka, “Mu ke na kutambula na zulu ya yawu na zulu ya mpunda! Mu ke na kutambulaka kaka na zulu ya yawu na zulu ya mpunda!” Ya kele kisika ya kele ntangu yayi:

Kivuvu ya kusakumuna, Yesu kele ya munu!
 Oh, wapi mutindu mwa ntomo ya ntete (mu me kuzwa muswa ya kukota na Yinto ya maza.)
 ya nkembo ya Kinzambi!
 Mu kele ntangu yayi kibyadi ya mpulusu,
 Nzambi futaka samu na munu,
 Ya kubutama na Mpeve ya Yandi mpe ya kusukula na Menga ya Yandi.

Kuyituka ve ti yayi kele disolo ya munu, yayi kele nkunga ya munu,
 Kuyimba—kuyimba balukumu ya Yandi ntangu nyonso.

⁸⁵ Beno me mona, ya kuzanguka na zulu ya binsinsya, ba basisaka na mvindu, ntomo ya ntete! Beto me kuzwa lufutu ntangu yayi ya difwa ya beto ya kulunga, samu ti Nzambi me tumuna yimeni misisa yina vwandaka na kati ya bima ya yinza mpe me kunda beto na bisika ya mazulu; me nangula munu, me nata munu kisika yankaka, me balula munu na bima ya yinza; me timuna misisa, bintala, nyonso, mpe me zangula munu, na ngaanda ya poto-poto ya ntoto, na ngaanda ya poto-poto ya disumu ya ntama; mpe me kuna munu na zulu ya Mongo ya Sion, ya kuvwanda na bilanga ya bayina ya luzolo, Santu ya Nzambi. Mpe ntangu yayi beto kele bantu ya yinsi ya Kimfumu yina, bampangi ya babakala mpe bampangi ya bakento na Klisto Yesu, mvindu mpe kubola mpe yimbi nyonso me basika na mabanza ya beto. Maza ya beto... banzutu kele ya kusukula

na maza ya kuvedila mpe ba me mwangisa Menga ya Mfumu Yesu na bantima ya beto, mpe Mpeve-Santu kele na mupepe ya Yandi yina ke fula na bintala ya beto kilumbu ya muvimba, na kukotisaka beto mpe kupusa beto mpe ke sala beto kuzwa misisa ya mbote mpe kukotisa na mudindu. Ya kele mbote ve? “Lufutu ya mpulusu ya beto.”

⁸⁶ Kapu yayi, ke monikisa difwa ya beto yina zimbanaka. Difwa ya beto yina zimbanaka me bakama na Tata Mukudi ya beto ya lemvo, ya ntalu. Mutindu Nzambi kulumukaka mpe kumaka...sobaka nzutu ya Yandi ya Nzambi mpe kumaka muntu, na kuvwanda muntu, samu na kukuma muntu Mpangi Mukudi, samu na kuvulusa yinza ya bantu na bantu ya yinza. Amen! Wapi mutindu ti Nzambi (ya Kimpeve) kumaka ya yinza samu na kukuma Tata, samu ti Yandi zolaka telemina ve misiku ya Yandi Mosi. Yandi zolaka kwiza na nzila ya mu...tata mukudi samu ti ya kele mutindu Yandi...yina kele dikani ya Yandi. Ya kele mutindu Yandi salaka yawu.

⁸⁷ Nzambi na kuzabaka ti muntu ke kubwa, kasi Yandi zolaka sala ve muntu kubwa. Nzambi na kuzabaka ti muntu ke zimbana, ata yina Yandi zolaka ve muntu kuzimbana. Kasi samu na kutula ti kumwangana ya nene ya binama ya Nzambi kumonisama na muntu nyonso, ti Yandi lenda vwanda Mukudi, Yandi lenda vwanda Mvulusi, muntu zolaka kubwa. Kubwa vwandaka na kati ya yandi, na yina ya vwandaka na kati ya Nzambi na kuvulusa dyaka yandi. Ya kele...beto fwana kuzwa mpimpa, samu na kusala kilumbu mbote. Beto fwana kuzwa kimbevo, samu na kusala beto kusepela mavimpi ya mbote. Nyonso, mbote mpe yimbi. Ntangu yayi, mpe Mpangi Mukudi ya beto...

⁸⁸ Ntangu yayi, mu zola ti beno tala awa. Mu ke na kutala kaka na kapu yayi ya 5, ntangu yandi talaka yawu, “Kuvwanda na boma ve!” Na nzila yayi ya 5, “Kuvwanda na boma ve!” Beno me mona, kuna ntangu nyonso...Beno kele na nsatu ve ya kuvwanda na boma ya kima.

...mosi ya bakuluntu tubaka na munu, Kudila ve: tala, Nkosi ya dikanda ya Juda, Nsimbulu ya David, me nunga samu na kufungula buku, mpe samu na kunyangula bidimbu sambwadi na yawu.

...mpe, tala, tala, na...tala, na kati-kati ya kiti ya kimfumu mpe...bibulu yiya,...na kati-kati ya bakuluntu, vwandaka ya kutelama Mwana - dimeme...

⁸⁹ “Mwana-dimeme.” Samu na yinki yandi monaka ve ntete Mwana-dimeme? Mwana-dimeme vwandaka ya kuvwanda na Kiti ya kimfumu ya Tata, na kati ya mikengi. Jean lendaka ve kumona na kati kuna, yandi monaka kaka bayintu yiya yina... to bibulu yiya yina vwandaka ya kutelama kuna, to Bakeluba yiya yina vwandaka ya kutelama kuna vwandaka keba Kisika

ya Santu. Mpe beto talaka yawu Lumingu me luta, mpe na zulu ya baleso yankaka, ti yandi monaka yawu kasi yandi vwandaka lenda ve kumona yina vwandaka na manima ya yawu. Mpe na kati kuna, na mbala mosi, kuna talanaka . . . na mutindu kaka ya mansweki, na mbala mosi, kuna vwandaka na Mosi, Mwana-dimeme.

⁹⁰ Ntangu yayi, samu na kulakisa ti Yawu vwandaka ve kibulu ya yinza, mwana-dimeme, samu ti Yawu basisaka Buku na diboko ya Yandi ya kibakala yina vwandaka na zulu ya Kiti ya kimfumu; mwana-dimeme zolaka sala yawu ve, beno me mona. Yandi vwandaka—Yandi vwandaka—Yandi vwandaka Mwana-dimeme, vwandaka Klisto. Na nzonzolo yankaka, na bankadulu ya Yandi Yandi vwandaka ya kulemvuka mpe ya lembami mutindu mwana-dimeme.

⁹¹ Ntangu yayi, beno tala, ya vwandaka Mwana-dimeme Mukudi, Mwana-dimeme Mukudi kaka mutindu ya ntete. Nzambi lenda soba ata mbala mosi ve! Amen! Mukudi ya ntete vwandaka mwana-dimeme, na disamba ya Eden, ya vwandaka mwana-dimeme ti Nzambi pesaka na munkayulu. Mpe awa ya kele dyaka, na kati ya Apocalypse, ya kele dyaka Mwana-dimeme. Samu na kuvulusa yinki? Nkadulu ya kubwa mpe difwa yina kubwaka ya bantu kubwaka. Mwana-dimeme me vutuka samu na kuvulusa, mutindu ya beto vwandaka na mbandukulu, samu na kuvulusa beto.

⁹² Samu na kuvulusa yinki? Na yinki Yandi ke vulusa beto? Samu na kubuka . . . kunata yawu na . . . Nyonso yina kele ya kuvuluswa kele kima yina ba zimbisaka. Ya kele kima yina zimbanaka mpe kuna ba me vutula dyaka yawu. Yinki Yandi ke vutula na beto, Mwana-dimeme yayi? Nyonso beto kuzwaka na mbandukulu.

⁹³ Yinki beto kuzwaka na mbandukulu? Luzingu ya Seko. Beto vwandaka bibiyadi ya yinza. Beto vwandaka na Luzingu, ata mbala mosi ve ti beto zolaka kufwa. Ata mbala mosi ve ti beto zolaka bela. Ata mbala mosi ve ti beto zolaka nuna. Ata mbala mosi ve ti beto zolaka vwanda na boma mosi. Kisika kele ata mafwa, ata ndyamu, ata yimbi, ata lufwa, ata nsuki ya mpembe, ata mapeka ya kubwa, ata mafwa, ata kudila. Beto vwandaka na Luzingu, ya Seko! Beto vwandaka na lutumu na zulu ya ntoto nyonso. Beto vwandaka kaka nzambi (kaka yina) na zulu ya ntoto; ke tambula, mpe kana yinti yayi talanaka ve mbote na kutelama awa, beto ke tuba, “Timuka mpe vwanda awa,” mpe ya ke sala yawu. Kana mipepe vwandaka fula, ti beto vwanda zola ve mipepe kufula, “Ngemba, vwanda swi,” mpe yawu vwandaka sala yawu. Mpe yinki Yandi kwizaka sala? Kuvutula nyonso yina dyaka na beto (Oh, oh, oh, oh, oh, la la!), kuvutula nyonso yina dyaka.

94 Mpe ntangu yayi yinza na yawu mosi ke na kunyonga, na kuvingilaka yinki? Kumonisama ya bana ya Nzambi, samu bana ya Nzambi monisamaka.

95 Mpe beto me kuzwa lufutu ya mpulusu ya beto ntangu yayi, mpe lenda baka mpangi ya beto yina ke na kufwa na cancer, mpe kutelama na mwa kupema yina ya mpulusu, mpe kusambila kisambu ya lukwikilu na zulu ya yandi yina ke vutula kivudi ya muntu na mavimpi ya mbote dyaka; yinki beto ke sala ntangu kima ya beto ya muvimba ke kwiza? Amen!

96 Yinza zaba yawu. Yinza ke na kunyonga mpe beto ke na kunyonga na yawu. Yinza ke na kuvingilaka kumonisama ya bana ya Nzambi, samu ti yinza kusingamaka na mfumu ya yawu. Ntangu mfumu ya yawu kusingamaka (yina ya kuzanguka), kuna yinza kubwaka na mfumu. Kasi ntangu Tata Mukudi yayi kwizaka (Alleluia!) mpe vutulaka muntu yina kele mfumu ya yinza. Na yina yinza ya muvimba ke na kuvingila na muntu, mfumu.

97 Yinki beto ke salaka? Beto ke baka soka mpe ke tula yawu na maboko ya beto mpe ke zenga yinti kana beto zola; kasi kilumbu yina beto ke sala yawu ve. Amen!

98 Yinza ya muvimba ke na kuvingila na mfumu ya yawu. Mpe mfumu kele bana ya Nzambi yina ba pesaka ntoto yayi. Ntangu yayi, Nzambi ke kuzwa mazulu ya Yandi, kieleka, kasi yayi kupesamaka na muntu. Mpe Mpangi Mukudi kwizaka samu na kuvutula beto na yina beto zimbisaka. Mutindu ya kele kitoko mingi! Oh! Mu banza ti ya kele kaka. . . “Mwana-dimeme Mukudi.”

99 Ntangu kisalu me mana, beto kele dyaka na bima nyonso. Wapi mutindu ya bima nyonso? Beto kele na ngolo nyonso. Beto kele na Luzingu ya Seko. Beto kele na mavimpi ya mbote ya Seko. Beto kele na buntwenya ya Seko. Beto kele na ngolo ya Seko. Oh, beto kele kaka ya Seko na ya Seko! Mpe, na yina, beto nyonso ke na kuvingila na ntangu yina na kukwiza, na kuvingilaka mpe kudilaka, na kuvingilaka.

100 Mpe Buku yayi ya bima sambwadi ya makani sambwadi ya mpulusu me natama na beto, mpe ya kele yina Buku yayi ke simba. Ntangu yayi, beto ke kota kuna na kapu ya 10 kisika Wanzio ya ngolo yayi tubaka kima yina. . . mpe Yandi vwandaka na Buku ya fyoti yina Jean zolaka kudya. Mpe ntangu yandi salaka yawu, yandi kuzwaka yawu na kivumu ya yandi mpe ya vwandaka ndudi, kasi na bikoba ya yandi ya vwandaka mbote.

101 Ntangu beno fwana kumina Yawu, kuna ya ke kuma ndudi, muntu nyonso ke telemina beno, muntu nyonso ke tuba “Nge kele exalté, nge kele *yayi, yina, to yankaka.*” Beno me mona? “Nge kele—nge kele—nge kele na yintu ya nge ve.” Na yawu ya kele mpasi na kumina Yawu; kasi ntangu beno ke pesa kimbangi ya Nkembo ya Yandi, Yawu kele mbote na bikoba ya beno. Kaka

yina. Beno me mona? Mpe ntangu beno ke telama na lukutakanu, beno ke tuba, “Nkembo na Nzambi! Alle- . . .” Oh, ntangu beno ke lutila na kiti ya nene yina, ya kele mpasi; kasi kuna ntangu beno me basika na kiti yina ya nene beno lenda pesa kimbangi ya yawu, kuna Yawu kele mbote na bikoba. Beno me mona? Ya kele kieleka. Ya kele Buku yaji ya mpulusu.

¹⁰² Ntangu yayi, awa, beto zola kupesa mwa kifwanukusu dyaka na nzila ya 5 awa, mpe na manima beto ke banda na . . . ke baka nzila ya beto ya 6 mpe kubanda. Ntangu yayi, mu zola beno kutala na dikani ya mpulusu mutindu Nzambi lakisaka yawu na ntwala, Yandi salaka yawu na mutindu ya kulunga na Ruth mpe Boaz. Mu . . . Ya kele kisika beto sukaka na Lumingu me luta. Ntangu yayi, mu zola kubanda kaka ntangu yayi kuna, bubu yayi, na Ruth mpe Boaz.

¹⁰³ Ntangu yayi, ya kele na bitezo yiya, to, bapwin yiya na Ruth mpe Boaz. Ya ntete kele Ruth *ke baka lukanu*. Bantu yikwa me kuwaka . . . mu kulonga nsangu yina? Ti beto tala maboko ya beno. Mu zaba . . . Mbote, beno nyonso, mu banza. Mu nataka yawu awa, mpe ba bakaka yawu na babande mpe nyonso yina. Ruth, ya ntete, yandi zolaka *baka lukanu* kana yandi zolaka kwenda na yinsi yayi, to ve, na Naomi. Yandi zolaka baka lukanu. Na yina na manima ntangu yandi kumaka kuna, kima yina vwandaka landa yandi zolaka sala vwandaka *kusadila* na bilanga ya Boaz; na ngaanda kuna, makulu-ngulu, vwandaka lokota na manima ya mionziki, vwandaka sadilaka. Mpe kuna na manima yandi kuzwaka lemvo na meso ya Boaz, kuna yandi zolaka *vingila* tii Boaz kusalaka mpangi mukudi, na kubaka dyaka nyonso Naomi zimbisaka samu na kukotisa Ruth, Moabite. Mpe kuna kitezo yina ke landa, kele—kele Ruth *ke kuzwa musendo*.

Ntangu yayi, beno tala mbote. Ruth, *ke baka lukanu* na mutindu ya kulunga . . .

¹⁰⁴ Oh, kana muntu tuba “ti Biblia kele ve dibanza ya kimpeve,” ya kele na kima ya yimbi na yandi. Konso Mpova ya Yawu kele dibanza ya kimpeve, konso Mpova ya Yawu ke lunga mbote kintwadi kaka mutindu kuvukana ya bima zole na—na—na dibaya. Ya ke vukana kaka na mutindu ya kulunga mutindu barouage na pine ya nene ke na kubaluka, kaka ya kusungama na ba-millionieme ya sekonde, kieleka kaka ya kulunga.

¹⁰⁵ Ntangu yayi, beno tala na yayi ntangu yayi, Ruth, *ke baka lukanu*, yandi zolaka baka lukanu kana yandi zolaka baka lukanu ya kukwenda kuna to ve. Yandi zolaka baka lukanu. Ntangu yayi, ya kele mutindu konso mukwikidi fwana sala. Beno fwana bika mitindu ya beno ya ntama, beno fwana bika luzingu ya beno ya ntama, beno fwana bika bima ya ntama—ya ntama ya yinza.

¹⁰⁶ Mpangi Roy, Mpangi ya kento Roberson ke na bela? Oh, mu me banza kaka ti yandi vwandaka bela to kima mutindu. Mu zolaka tuba na kunata yandi awa kana yandi vwandaka ya kubela to kima mutindu.

¹⁰⁷ Ba zolaka bika mitindu ya ntama ya luzingu, to kima mosi ya mutindu yina, mpe—mpe kukota na yinsi ya malu-malu, na bantu ya malu-malu yina beno zabaka ntete ve. Ya kele yina beno salaka, ntangu beo kumaka Muklisto? Beno me bika kivinga ya billard, beno me bika ba-night clubs. Beno zolaka kota na nkonga ya bantu yina vwandaka talana mutindu me kuzwa kutetika, bawu ke ningana mpe ke tekita mpe ke dila, mpe ke ningisa yintu ya bawu mpe ke mata mpe ke kulumuka, mpe, samu na yinki—samu na yinki, ya vwandaka—ya vwandaka “nkonga ya bilawu” na beno. Na yawu beno zolaka baka lukanu kana beno ke kwenda to ve. Ya kele kieleka. Mpe beno vwandaka zaba ti ntangu beno ke sala, bantu ya beno mosi zolaka seka beno, bayina beno zolaka bika. Ya kele kieleka? Ya kele kaka otomaniki. Beno kaka. . . bawu zolaka vingila yawu samu na kubanda, samu ti ya kele mutindu ya kele.

¹⁰⁸ Ntangu yayi, Ruth kuzwaka kima mutindu mosi. Yinki bantu ya Moab ke tuba na yandi ntangu yandi zabukaka kuna na Israel, na nkonga ya bafanatiki? Beno me mona, yandi zolaka baka lukanu. Yandi zolaka baka lukanu. Mpe beno fwana baka lukanu. Mpe, na nsuka, ntangu yandi bakaka lukanu ya yandi, yandi kwendaka kuna na yinsi ya malu-malu.

¹⁰⁹ Ntangu yayi, ya kele kunungisama. Ya kele kieleka? Ntangu yayi, beno tala mbote Dibuundu yayi. Oh, ya kele ya kulunga.

¹¹⁰ Beno zaba mutindu beto. . . Bantu yikwa na kati ya beno kuwaka *Nkuna ya Abraham* ntangu mu longaka na yawu? Na kulakisaka *kunungisama*, *kusantisama*, *mbotika* ya Mpeve-Santu. Ntangu yayi, beno tala kana yayi kele kieleka to ve.

¹¹¹ Ruth, na *kubakaka lukanu* ya yandi, kifwanusu ya Dibuundu, Dibuundu ya Bantu ya makanda. Yandi me baka lukanu, mpe me sabuka yinsi. Ntangu yayi, bambala mingi, beto ba-Methodiste mpe ba-Baptiste, beto ke banza ti ya kele nyonso beno fwana sala. Yandi vwandaka me banda kaka! Yandi kumaka ntete ve kisika mosi, yandi vwandaka me kota kaka na yinsi.

¹¹² Ntangu yayi, kima ya kusala yina vwandaka landa, yandi zolaka *sala*. Yandi kumaka muntu ya misiku. Yandi zolaka “sala samu na mpulusu ya yandi mosi na boma mpe kutekita” mutindu beno salaka. Yandi kwendaka na bilanga mpe tulaka bilele ya yandi, mpe kwenda na bilanga mpe vwanda lokota na manima ya bantwenya ya bakento samu na kuzwa madya ya kilumbu. Ya kele kieleka? Yinki yandi vwandaka sala? Yandi vwanda meka na kuzwa lemvo na Boaz. Na yawu yandi salaka ya yandi nzila na nzila ya kitezo ya misiku.

113 Mpe ya kele kaka yina Dibuundu salaka. Ba-Luther kwikilaka Yawu na nzila ya lukwikilu mpe kotaka na yinsi. Kasi ba-Methodiste longaka kusantisama, yina vwandaka mutindu ya kutala na misiku ya Yawu, beno me mona, “Benoni fwana sala kima mosi.” “Mu fwana bika! Mu fwana bika nsuki ya munu kukula,” ke tubaka bakento. Kieleka, bawu ke sala dyaka ve yawu; kasi bawu—bawu vwandaka sala yawu, kubika nsuki ya bawu kukula. Bawu zolaka bika kupakula na bizizi ya bawu. Bawu vwandaka lwata ve bazupe ya bawu—ya bawu ya yimbi mpe—mpe, to, ya nkufi mutindu bayankaka salaka. Bawu zolaka sala kima mosi. Benoni me mona? Yawu yina yandi salaka, na kitezo ya kunungisama, na kitezo ya kusantisama.

114 Ntangu yayi, na nsuka yandi kuzwaka lemvo ya Boaz, yinki kusalamaka? Na yina Naomi tubaka na yandi, “Nge *vingila* awa na yina Boaz ke sala kisalu ya mpangi mukudi, samu ti yandi kele yina kaka lenda sala yawu. Yandi kele mpangi mukudi ya beto yina ke landa, mpe nge *vingila* kaka awa. Kukwenda dyaka ve na bilanga. Kusala ve *yayi, yina, to yankaka*. Nge *vingila* kaka tii mpangi mukudi ke manisa.” Mpe yandi *pemaka*. Amen!

115 Ya kele kieleka yina Dibuundu me kuma na kitezo yayi ya nsuka ya Pentecote. Benoni me mona? Na mbandukulu ya Pentecote bawu nyonso vwandaka sala mpe bawu “zolaka sala *yayi*,” mpe ba ningisaka bawu mpe nyonso yankaka. Ntangu yayi yinki Dibuundu ke na kusala? Dibuundu ya kieleka ke na *kupemaka* kaka. Yinki kele Kupema? Awa ya kele, *Kupema* kele “Mpeve-Santu,” kilumbu ya *saba*. (Ba-Adventiste du Septième jour zola kutuba na beto, beno zaba, samu na yina me tala kilumbu ya sambwadi ya *saba* to kima mutindu yina.) Na Hebreux kapu ya 4, ke tuba, “Beto bayina me kota na *Kupema* ya Yandi me sukisa na bisalu ya beto mutindu Nzambi salaka na ya Yandi.” Na yawu *saba* kele Mpeve-Santu.

116 Mpe ntangu Ruth vwandaka *pema*, ya vwandaka kifwanusu ya Dibuundu yina ke na kupemaka na bansilulu ya Nzambi! Beto kele na lufutu ntangu yayi ya mpulusu ya beto. Beto kele na boma ve kana beto ke kwenda kuna to ve, beto ke na kwenda! Ya kele kieleka. Nzambi tubaka mutindu yina! Nzambi silaka yawu mpe beto kele na lufutu (Amen.), ba me yamba beto, Klisto me ndima beto. Ata mutindu kele na kukwenda ntama na Yawu ntangu yayi, beto kele kuna! Amen! Nyonso beto ke sala kele kaka kuvingila tii. . . Yandi baka. . . Yandi ke manisa na Bumpangi Mukudi. Beto kele na lufutu ya yawu kaka ntangu yayi, ke *vingila* ntangu yina Yandi ke vutuka.

Mpe na manima wapi kima vwandaka landa samu na Ruth, Ruth zolaka *kuzwa musendo*.

117 Ya kele yina Dibuundu salaka. Yawu kotaka na kunungisama, na Luther. Yawu kotaka na kusantisama, na Wesley. Kotaka na mbotika ya Mpeve-Santu, na bilumbu yayi

ya nsuka. Mpe ntangu yayi ke na *kupemaka* na lufutu ya difwa ya beto ti beto me zaba ti kima mosi me salama na kati ya beto, beto me luta lufwa na Luzingu, mpe ke na kuingilaka, ke na kunyongaka na yinza, na ntangu yina ntangu beto ke kuzwa Luzingu ya lenda kufwa ve, luzingu ya muvimba yina ke kufwa ve; banzutu ya beto ke vuluswa. Nyonso me vuluswa, mpe beto ke na kuingila kaka na Yandi na kuvutuka na mwelo. Amen!

118 Na manima yinki? Ba pesaka Ruth *musendo*. Ya kele ntangu beto ke kuzwa musendo. Ya kele yina Buku yayi ya bidimbu sambwadi ke zibula samu na beto. Yinki kele bima yayi? Ya kele mansweki. Ya kele ve ya kusonika na kati ya Ndinga, ba fwana monisa yawu na nzila ya Mpeve-Santu; kasi kana beno tala, na yina, ba me monikisa nyonso na nzila ya Masonuku kasi ya vwandaka ya kubumbama na bantu. Ntangu beto ke kuma na rouleau na manima ya mwa ntangu, beno ke mona mutindu ya vwandaka ya kukanga, kuna beno ke zaba kaka mutindu bima yayi ke zibuka.

119 Ntangu yayi, inga, *kupema*. Yinki Ruth na yisi ya kunungisama... Beno me mona yawu, beno tuba "Amen." [Dibuundu me tuba, "Amen."—Mu.] Ruth na yisi ya kusantisama, *salaka*, misiku. Ruth, *kupemaka*, na kuingilaka na Boaz na kuvutuka na kisalu me manisa.

120 Ntangu yayi, Boaz ya beto me manisa kisalu na Calvaire. Kasi ntete Yandi kwiza baka beto na Yinzo ya Yandi, Yandi ke kwenda ntete na Yinzo (na Jean 14) samu na kuyidika kisika samu na beto. Nkembo!

Ti bantima ya beno kuvwanda na mpasi ve: kana beno ke kwikila na Nzambi, beno kwikila mpe na kati ya munu.

Na yinzo ya Tata ya munu kele na bisika mingi: kana ya vwandaka ve, mu zolaka tuba na beno. Kasi Mu ke kwenda mpe ke yidika kisika samu na beno.

Mpe... kuvutuka dyaka, samu na kuyamba beno... .

121 Beno me mona, Boaz me kwenda kuna, yinki yandi salaka? Yandi me kwenda kuna, me telama... me baka bakuluntu mpe me kwenda na ntwala ya mwelo, me katula sapatu ya yandi, mpe me tuba, "Ti ya zabana bubu yayi ti mu me vulusa Naomi mpe difwa ya yandi nyonso." Yandi kuzwaka Moabite na yawu.

122 Mpe ntangu Yesu kwizaka, nani Yandi kwizaka vulusa? Israel. Yinki Yandi salaka na kubaka Israel? Yandi kuzwaka Kento ya makwela ya Bantu ya makanda. Kieleka, Yandi salaka yawu, ntangu Yandi bakaka Israel. Yandi kwendaka... Mpe Yandi kwendaka na Bantu ya Yandi, Yandi zolaka sala yawu. Yinki vwandaka kima ya ntete Yandi zolaka sala? Kuvulusa Bantu ya Yandi. Mpe Dibuundu ya Bantu ya makanda kele kaka mpangi ya kento samu na kento yina, dibuundu ya Israel.

Kieleka! Na yawu Yandi zolaka vulusa Israel samu na kuzwa *Yayi*. Mpe yandi zolaka vulusa Naomi samu na kuzwa Ruth, kento ya makwela.

¹²³ Ntangu yayi, yinki yandi salaka? Ntete yandi baka yandi . . . Oh, nkembo! Fiu! Yinki yandi salaka? Yandi kwendaka na bilanga, mu banza ti yandi pakulaka nyonso mpe ti yandi tulaka batapi ya malu-malu na ntoto. Oh, ya lendaka vwanda ti yandi—yandi tungaka yinzo ya malu-malu. (Na beto, yawu kele Yinzo ya malu-malu.) Mpe yandi kubikaka nyonso, mpe na manima yandi vutukaka na bouquet ya bafololo na kazaka ya yandi. Amen!

¹²⁴ Yinki Ruth vwandaka sala? Kima mosi ve. Kupema! Kuingila! Ata mpasi dyaka ve, ata kukwamisa dyaka ve!

¹²⁵ “Ya ke lomba ti mu vwanda Methodiste? Mu fwana kuvukana na ba-Baptiste? Ya ke lomba ti mu vwanda Presbyterien?” Ve, tata, beno kuzwa kaka Mpeve-Santu mpe beno pema. [Kisika ya mpamba na bande—Mu.]

Beto ke na kuingila na nkwezulu ya kilumbu yina ya kiese ya Millenium, (Nkembo!)

Ntangu Mfumu ya beto ya kusakumuna ke kwiza kubaka Kento ya Yandi ya makwela yina ke na kuingila;

Oh! Ntoto ke na kunyonga, ke na kudila samu na kilumbu yina ya kimpwanza.

Nyonso ya yawu, yinza ke na kunyonga, makasa ya fiki, nyonso ke na kuingila na kilumbu yina ya kimpwanza, ntangu Mpangi Mukudi ke vutuka mpe ke baka Kento ya Yandi ya makwela.

¹²⁶ Ntangu yayi Yandi ke na kupema. Na yisi ya kusantisama? Ve. Na yisi ya kunungisama? Ve. Kasi na yisi ya nyonso zole *kunungisama, kusantisama*, mpe na kati ya *kupema*.

¹²⁷ Ntangu yayi, Esaie, kapu 28 mpe nzila ya 18, Yawu me tuba:

. . . lutumu fwana vwanda na zulu ya lutumu, . . . musiku na zulu ya musiku, . . . awa fyoti, mpe kuna fyoti: beno simba yina kele mbote.

Samu ti na bikoba ya lunkukama mpe bandinga yankaka Mu ke zonza na bantu yayi.

. . . Mpe yayi kele kupema, yayi kele saba . . . yayi kele ntangu Dibuundu ke kwenda na kuingila.

¹²⁸ Beno tala mutindu beto me luta na kunungisama, kusantisama, ntangu yayi na kati ya mbotika ya Mpeve-Santu: ke na kupema, ke na kuingila. Yinki? Mpe ntangu yayi, awa, ntangu beto ke kota na baluzayikisu yayi beno ke mona yina ya kele ntangu yayi. Beno me mona? Mutindu yina kaka . . . Bima yayi zolaka longama ve tii kilumbu yayi. Ya zolaka ve, ba zolaka longa yawu ve. Ya vwandaka ve ya kuzibuka na bana ya bantu. Biblia me tuba mutindu yina. Mu lenda lakisa beno awa na kati

ya Masonuku ti ba tubaka ti ya ke vwanda ve ya kuzibuka tii (bana ya bantu), tii kilumbu yayi. Mpe ntangu yayi beto ke na kumanisa yawu na bima ya nene yayi ya kusakumuna. Ntangu yayi. . . Mbote mingi.

¹²⁹ Nzila ya 6. . . To kiti ya 5, kuluntu na nzila ya 5 vwandaka kieleka ntangu yandi tubaka, “Tala, Mwana-dimeme!” Kasi, ntangu yandi talaka na nziunga, yandi monaka Nkosi. Ya vwandaka Nkosi na kisika ya Mwana-dimeme. Kasi na yina yinki ya vwandaka? Kisalu ya Yandi ya kivukisi vwandaka me manisa, kivukisi. Yandi vwandaka. . . bika na kuvwanda Kivukisi na nsuka ya nsungi ya Dibuundu, samu na kukuma Nkosi ya dikanda ya Juda, kisalu ya Yandi ya kivukisi kumanisaka. Mpe Yandi zolaka kuma Nkosi yina vwandaka Zuzi, ntangu yayi, mpe Yandi bakaka. . . ntangu Yandi bakaka Buku na diboko.

¹³⁰ Ntangu yayi, beno bambuka moyo, ntangu muntu vwandaka kwenda na kuvulusa (Beno zimbana yawu ve, ntangu yayi.), ntangu muntu vwandaka kwenda na kuvulusa, yandi vwandaka baka bantu na yandi, ba vwandaka bakuluntu mpe vwandaka kwenda na mwelo ya mbanza, mpe kuna yandi—yandi—yandi vwandaka samuna lukanu ya yandi na kuvwandaka kuna. Ya kele yina yandi vwandaka sala, yandi vwandaka kwenda na mwelo, vwandaka tuba, “Mu kele awa samu na kusiamisa munu mosi mutindu mpangi mukudi mpe na difwa yayi, mpe mu kele awa na kuzabanaka munu mosi na ntwala ya bakuluntu yayi ya mbanza.” Beno me mona?

¹³¹ Mpe ntangu. . . Jean dilaka. Ntangu yayi, muntu, mutindu mu vwandaka tubaka sabala ya nsuka, bawu tubaka, “Jean dilaka samu ti yandi talaka ve muntu ya kulunga.” Ya vwandaka ve yawu. Muntu na yisi ya lutumu ya Mpeve-Santu zolaka dila ve samu na yawu. Yandi banzaka ti, “Samu ti yandi vwandaka ve ya kulunga,” mu banza ti Jean yandi mosi vwandaka ve ya kulunga. Ya kele ve na muntu yina kele ya kulunga. Kasi yandi dilaka ve samu na yawu.

¹³² Mu banza ti yandi vwandaka dila samu na kyese samu ti yandi monaka dikani nyonso ya mpulusu yina sonamaka na Buku yayi awa. Ya vwandaka ve samu ti ya vwandaka ve na muntu yina vwandaka ya kulunga, samu ti, kuna telamaka Mwana-dimeme yina vwandaka ya kulunga. Na yawu yandi vwandaka dila, kuna yandi tubaka, “Oh, nkembo na Nzambi!” Beno kuwa yandi mbala mosi ntangu yandi ke bokaka. Ntangu yayi, kasi beto ke tala yandi awa ke na kudila samu ti yandi vwandaka na kyese mingi samu ti Mwana-dimeme kubakaka Buku samu. . . na diboko ya Yandi yina vwandaka na zulu ya Kiti ya kimfumu.

¹³³ Mpe kaka na ntangu yandi salaka. . . Ntangu Wanzio yayi, Wanzio ya ngolo yayi, lookaka “Nani kele ya kulunga?” yandi

vwandaka sosa kaka kuna, yandi vwandaka sosa Mpangi Mukudi. Mpe na mbala mosi na manima, yandi tubaka, “Nani kele ya kulunga samu na kubaka Buku?” Kuna kima. . . Na yina Jean bandaka na kudila. Na yina yinki salamaka? Yandi monaka, Buku vwandaka kuna. Kuna Yawu vwandaka, kasi nani vwandaka ya kulunga?

¹³⁴ Mbote, kuna vwandaka Gabriel, ya kieleka, yandi vwandaka ya kulunga; kasi, beno me mona, yandi vwandaka ve muntu, mpe yandi vwandaka Wanzio. Mpe kuna me telama Michael, yandi vwandaka ya kulunga; kasi yandi vwandaka ve muntu, yandi vwandaka Wanzio. Na yina ya zolaka vwanda muntu yina kumaka muntu ya ntoto mutindu beto vwandaka. Mpe kuna ntangu yandi monaka Mwana-dimeme yayi yina ba kufwaka na mbandukulu ya yinza, kukwiza, mpe yandi monaka ti ba kufwaka Yandi nzila nyonso na mbandukulu ya yinza, kuna Jean dilaka. Amen! Kuna ya vwandaka, yandi monaka kima nyonso ya muvimba. Beno me mona?

¹³⁵ Mpe kaka na ntangu yandi yufulaka “Nani kele ya kulunga?” yandi vwandaka lakisa nkwizulu ya Mpangi Mukudi. Mpe awa Yandi me telama, Mwana-dimeme. Mpe yinki Yandi salaka? Yandi kwendaka kuna na Kiti ya kimfumu kisika Mpeve ya Nzambi vwandaka, mpe me baka Buku na diboko ya kibakala ya Yandi yina kele ya kuvwanda na zulu ya Kiti ya kimfumu. Mpe bakuluntu nyonso fukamaka mpe tubaka, “Nge kele ya kulunga samu ti ba kufwaka Nge.” Beno me mona? Mpe na yina Yandi kumaka kuna. . . Buku ya Yandi, to mwa Buku ya mpulusu, to—to Buku ya lusambulu na nsungi ya Dibuundu kusukaka, ntangu yayi Yandi me kuma Mukudi.

¹³⁶ Ntangu yayi, luzayikisu ya mutindu Yandi salaka ya ke vwanda na kati ya Bidimbu Sambwadi yayi. Ntangu yayi, beto ke tala na. . . mutindu ntangu Buku ya kisalu ya kivukisi ya Yandi kusalamaka, kisalu kumanisaka, ntangu yayi na makapu tatu ya ntete ya Dibuundu, yina me suka. Kasi ntangu yayi mpulusu, mpulusu fwana kumonisama. Yinki ya kele? Ntangu yayi, ntangu Yandi bakaka Buku yayi. . . Ntangu yayi, beno meka na kutula dibanza ya beno ya kati, samu ti, beto me kuzwaka ntete ve bampimpa sambwadi yayi, beno ke—beno ke kuzwa yawu ntangu yayi.

¹³⁷ Kana beno ke bakula yawu ve, beno telemisa kaka diboko ya beno, beno tuba, “Mu ke—mu ke bakula yawu ve,” beno me mona, beno tala, samu mu zola ti beno vwanda ya kieleka ntangu yayi.

¹³⁸ Ntangu yayi, beno tala “Mpulusu.” Na manima, na nswalu-nswalu na manima lusambulu ya Yandi me salama samu na Dibuundu, kuna Yandi me monisama Yandi mosi mutindu Mpangi Mukudi. Beno ke landa yawu ntangu yayi? Mpe ntangu yayi Yandi ke monisa na Dibuundu mutindu Yandi salaka yawu. Mpe kuna kana luzayikisu yayi me banda yimeni, na yina ya ke

lakisa ti beto kele na nsuka ya nzila. Amen! Ntangu yayi, beno ke mona kaka kana Yayi . . . kana Ya kele kieleka to ve, na yina beto ke landila Masonuku awa.

¹³⁹ Beto ke mona: Yinki ba vwandaka monisa? Yinki kele luzayikisu ya mpulusu, wapi mutindu beto vuluswaka? Beno tala kaka awa na mwa bamvula yayi me luta yinki salamaka: luzayikisu ya Nkumbu ya Yesu na mbotika ya maza, luzayikisu ya ata difelo ya Seko, ya zabanaka ntete ata mbala mosi ve (beno vwandaka banza ti bantu ya beno ya luzolo zolaka vwanda ya Seko). Beno me mona?

¹⁴⁰ Mpe beno lenda ve kuzwa Luzingu ya Kukonda nsuka kana ti beno me vuuka. Beno kele na Luzingu ya Seko, na yina beno lenda ve kuyokama na difelo ya Seko. Ba ke semba beno samu na masumu ya beno na luzingu ya beno ya kimuntu, kasi beno lenda ve kuzwa Luzingu ya Seko na difelo. Kana beno kele na Luzingu ya Seko, na yina beno lenda ve kuyokama ntangu nyonso samu ti ya kele kaka na mutindu mosi ya Luzingu ya Seko. Mpe mu ke kwikila ti Dibuundu ke bakula yawu.

¹⁴¹ Ntangu yayi, yinki ya kele? Yinki kele bima yankaka? Dikani ya mpulusu. Beno tala kaka yina pesamaka na beto ntama ve na nzila ya Mpeve-Santu, beno me mona: Nkuna ya Abraham, yina luzayikisu zola kutuba.

¹⁴² Nkuna ya nyoka. Beno me mona Buku yayi ya Apocalypse? Beno tala mbote na yina beto ke kuma na yawu, mutindu ya ke zibula yawu. Mpe mu me siamisa kaka yawu awa na nzila ya Masonuku, ya kele kaka Kieleka. Mu ke kwenda mbala mosi na Apoc- . . . to, ke kwenda mbala mosi na Genese mpe kubaka yawu mpe kulakisa ntangu kidimbu yina kuzibukaka yawu me vutuka mbala mosi na kati ya Biblia, kubanda Genèse tii na Apocalypse.

¹⁴³ Beno banza kaka, kubanda Genèse tii na Apocalypse ya vwandaka ata mbala mosi ve na muntu yina botamaka na nkumbu ya “Tata, Mwana, Mpeve-Santu.” Ya kele mbotika ya luvunu! Mu telamaka na ntwala ya milongi bankama tatu mpe kima na kimvuka ya nene ya milongi ya Chicago kilumbu yankaka yina, mpe siamisaka yawu tii bawu nyonso dilaka mosi na yankaka. Makumi sambwadi ya bawu ke na kwiza kuzwa mbotika na Nkumbu ya Mfumu Yesu.

¹⁴⁴ Mpe nkuna ya nyoka me banda katuka Genèse! Kana nyoka salaka ve . . . kana yandi vwandaka na nkuna ve, na yina Klisto zolaka butuka ve; samu Yandi tubaka, “Mu ke tula kuyina na kati-kati ya Nkuna ya nge mpe nkuna ya nyoka.” Mpe kana nkuna ya nyoka vwandaka disolo ya luvunu na yawu Klisto vwandaka disolo ya luvunu, mutindu mosi kele Dibuundu disolo ya luvunu, beno me mona ya kele nyonso, beno lenda kabula yawu ve. Nyoka vwandaka na nkuna, mpe ya kele yina ke yitukisa bawu mingi. Samu na yinki bawu lenda ve kubakula yawu? Samu bawu kele ve na luzayikisu ya yawu.

145 Samu na yinki bawu ke kwiza ve mpe kuzonzila yawu na munu? Chaire keke ntangu nyonso pwelele, mu ke kutana na muntu nyonso. Mu ke swana ve na bawu, kasi kieleka mu ke zonzila yawu na bawu, kana bawu zola. . . Mu yufulaka kaka bawu kuna na ntwala ya kimvuka. Mu zola ti mosi ya beno kutuba na munu kisika ya keke luvunu! Beno telama ve na nsongi mosi mpe kuzonzila na munu, na zulu ya yawu, beno kwiza na ntwala ya munu mpe beno telama. Ti beto—ti beto sala yawu na mutindu ya kieleka, ti beto kwiza awa mpe ti beto mona nani keke ya kusungama mpe ya kusungama ve na zulu ya yawu. Kasi bawu ke kota na yawu ve. Kukondwa ntembe, bawu zaba ya kulutila. Beno me mona?

146 Samu ti, munu ve, kasi ya keke Mpeve-Santu, Wanzio ya kieleka ya Nzambi yina beno ke monaka. Wapi mutindu samu na bilumbu yayi awa ntangu bima nyonso yayi kusalamaka, mpe Mbazi ya Mfumu yayi yina me telama pene-pene? Mu zolaka zaba ve bima yayi, kasi ya keke ngunga, ya keke awa. Ntangu beto ke kota na kati ya Bampeve sambwadi yayi, bibongo sambwadi, mpe nyonso, bubu yayi, kana Mfumu zola, beno ke mona kisika ya keke. Ya keke—ya keke na kati ya ngunga yina beto keke ti baluzayikisu yayi fwana kwiza. Ya keke Buku ya baluzayikisu, kumonisa ya Yesu Klisto. Mpe beto me mona, kapu kaka ya ntete, Yandi monisaka nani Yandi vwandaka. Mpe ntangu yayi Yandi ke na kuzwa Bidimbu Sambwadi, na kumonisaka mutindu Yandi vulusaka ntoto.

147 Mpe mosi ya bawu vwandaka na Nkumbu ya Yesu Klisto. Yankaka vwandaka na kukatula boma na bantu, mutindu: Seko, mpulusu ya Kukonda nsuka, kunungisama na nzila ya lukwikilu, kusantisama, mbotika ya Mpeve-Santu. Mpe yinki? Ti beto keke ya kukeba ya Seko, na kukatulaka bantembe nyonso na bantu. Kana beno keke na lufutu ya mpulusu ya beno, Nzambi me kanga beno yimeni tii kilumbu ya mpulusu ya beno. Ephésiens 4:30 ke tuba:

. . . nyongisa ve Mpeve-Santu ya Nzambi, na yina ba kangaka beno tii kilumbu ya beno ya mpulusu.

148 Ntangu yayi, wapi mutindu beno ke—wapi mutindu beno ke vutuka manima? Beno lendaka vutuka, kasi beno lenda vwanza ya kuzimbana ve. Mpe kana beno bikana na kitezo yina, ya ke lakisa ti beno vwanza ve na Yawu na mbandukulu. Kasi kana beno keke mwana ya Nzambi, “Musambidi mbala mosi me vedama keke dyaka ve na konsiansi ya disumu,” me tuba Hebreux. Ya keke kieleka. Na yawu beno lenda ve—beno lenda ve kuvwanza Muklisto, beno lenda ve kuzwa Mpeve-Santu mpe kubasika mpe kuzinga na yinza. “Kana beno zola yinza, bima ya yinza, luzolo ya Nzambi keke ve na kati ya beno.” Na yawu beno ke na kuwa kaka makelele ya luvunu kisika mosi, dyabulu me fulusa beno na lunangu. Kasi kana beno ke fyongonina luzingu ya beno na nzila ya Ndinga ya Nzambi mpe ya ke lakisa ti beno

ke na kuzingaka kaka na yisi ya matiti ya Biblia yina, kuna beno kele na nkebolo ya Seko.

¹⁴⁹ Mpe ya kele na kima ve na kuvwanda na boma. Yina Nzambi silaka, Nzambi ke sala yawu. Mu ke telemina muntu nyonso na kubaka yawu. Beno baka kaka yina mpe beno tambula na Ndinga yina, mpe beno tala yina ke salama na beno. Mpangi, Yawu ke nungisa nyonso, Nzambi tubaka mutindu yina. Nyonso yina Nzambi silaka, ya ke salama.

¹⁵⁰ Mu . . . Na yina mu samunaka na beno ti kisalu ya munu vwandaka banda, awa ya me kuma na kutala bamvula kumi na tanu mpe bisika nyonso na yinza, mpe ata mbala mosi ve ti Yawu me kubwaka. Samu na yinki? Samu, na kubanda, mu telemaka na zulu ya nsilulu ya Nzambi. Mu zabaka ti Yawu vwandaka Kieleka. Beno bika ve mu meka na kutuba na beno ti ya kele mwa ndwenga ya munu ya nene, kasi Yandi Yina monisaka mansweki ya ntima kele Muntu yina kaka yina lakisaka munu na kati ya Masonuku. Samu ti munu mpe ve . . . ntangu mu bandaka ntete na kulonga, pene ya bamvula makumi tatu me luta, Mu zola kuzwa ndiku ya munu ya kento kuvwanda kuna mpe kutanga Biblia. Mu vwanda zaba ve kutanga Yawu, na kukwendaka ve na lukolo ya yinda. Mpangi ya kento Wilson, nge fwana bambuka moyo na yawu ntangu Hope vwanda tangaka Biblia samu na munu kuna na manima, kuvwanda mpe kutanga Yawu, mpe mu vwanda tubaka, “Beno kuwa yina Yawu ke tuba, beno sala kaka yina Yawu ke tuba. Ya kele nyonso mu zaba na kutuba na beno.” Mpe bawu nyonso yina salaka yawu, mbote, bawu vwanda sungama. Ya vwandaka kaka yina. Mu ke—mu ke . . .

¹⁵¹ Yandi vwandaka tuba, “Nzambi zolaka mingi yinza ti Yandi pesaka Mwana ya Yandi mosi kaka.”

Mu vwanda tuba, “Bantu yikwa ke kwikila na Yawu?” “Tanga yina ke landa, cherie.”

“Pesaka Mwana ya Yandi mosi kaka, yina ke kwikila na Yandi kele na Luzingu ya Seko.”

Mu vwanda tuba, “Bantu yikwa ke kwikila Yawu? Beno me kuwa yina Yawu me tuba.” Mu vwanda lenda ve kutanga Yawu munu mosi.

¹⁵² Na yawu, beno me mona, mu kuzwaka ve nzila ya kutanga na lukolo mosi. Kasi, oh, mu zola lukolo yina mu kwendaka! Oh, kuna na mwa caverne kisika mosi kuna, maboko ya munu na zulu na Nzambi, kilumbu na manima ya kilumbu, ntangu Mpeve-Santu kulumukaka na lembami ya Yandi mpe bandaka na kumonisama Yandi mosi, mpe tubaka, “*Yayi* kele *mutindu yayi*, mpe *mutindu yayi* kele *mutindu yayi*.” Mpe mbala mosi ve ti muntu mosi, kivangu ya mutindu mosi, me lendaka na kutula maboko ya yandi na zulu ya kima ya Yawu. Mpe ata bufanatiki nyonso mpe nyonso yankaka yina kombolaka yinsi, Nzambi me simba Yawu na zulu mpe mpembe, mpe me tambusa

Yawu bisika nyonso na yinza. Alleluia! Beto kele na ntangu ya nsuka, bampangi. Beto kele awa na ntangu ya nsuka. Kaka yina. “Ya ke vwanda na Nsemo na ntangu ya nkokila.” Yawu yina kaka Yandi tubaka.

¹⁵³ Ntangu yayi, ya kele Buku ya Apocalypse, Nzambi ke monana Yandi mosi. Mpe ntangu yayi na nzila ya mansweki yayi ya nene, Yandi ke na kumonisa Nkumbu ya Mfumu Yesu Klisto na mbotika, Yandi ke na kumonisa ti ya kele ve na kima mutindu Difelo ya Kukonda nsuka (ya lenda vwanda ve, ya kele ve na Masonuku na kati ya Biblia ke tuba ti ya kele na kima mutindu yina).

¹⁵⁴ Ntangu yayi, ya kele na difelo, mpe ya kele na dyanga ya tiya, mpe ya kele kisika ba ke semba bantu ya yimbi, kasi na nsuka bawu ke yokama. Ya lenda vwanda nkama kumi ya mafuku ya bamvula, kasi na nsuka bawu ke yokama. Samu ti beno lenda ve kuzwa Luzingu ya Seko kana ti beno me vuuka. Mpe kana beno ke yokama ya Seko, beno fwana vwanda na Luzingu ya Seko. Mbote, mbanzulu ya beno ya mbote ke lakisa beno yawu. Beno me mona? Wapi mutindu beno lenda kuzwa ya Se- . . . ? Bantu yikwa zaba ntangu beno kele na Luzingu ya Seko ti beno me vuuka? Mbote, kana beno ke yokama ya Seko, beno fwana vwanda ve na Luzingu ya Seko samu na kuzaba yawu? Na yawu, beno me mona, ya ke sala ata mbote ve. Beno me mona?

¹⁵⁵ Ntangu yayi, “nkebolo.” Bayina Yandi zabaka ntete, Yandi bokilaka bawu; bayina Yandi bokilaka, Yandi me nungisa bawu; bayina Yandi me nungisa, Yandi me kembisa yimeni. Paul tubaka na beto, na kapu ya 1te ya Ephésiens, ti “Nzambi, na ntwala ya mbandukulu ya yinza, solaka beto na kundimama ya bana na nzila ya Klisto Yesu.”

¹⁵⁶ Jean ke tuba na beto awa na Apocalypse, ti “Mbeni na bilumbu ya nsuka, mbeni yina na nsambululu, ke kota na kati-kati ya bantu mpe ke kuzwa ba-organisation mpe nyonso yina, mpe kusambila mpe nyonso,” mutindu bawu kele na yawu bubu yayi, “mpe ke vuna bantu ya kieleka ya Kusolama kana ya lendaka salama, mpe ke vuna bayina *nyonso* bankumbu kele ve ya kutula na Buku ya Luzingu ya Mwana-dimeme kubanda mbandukulu ya yinza.”

¹⁵⁷ Na wapi ntangu ba tulaka nkumbu ya beno na Buku ya Luzingu ya Mwana-dimeme? Ntete mbandukulu ya yinza. Na wapi ntangu ba kufwaka Klisto, bamvula funda mosi na nkama yivwa me luta? Ve, tata. Ntete mbandukulu ya yinza. “Mwana-dimeme kufwaka na ntwala ya mbandukulu ya yinza.”

¹⁵⁸ Beno me mona yina ya ke na kusala? Ya kele bidimbu yayi yina ke na kuzibukaka, me banda kaka na kumonisa dikani ya mpulusu, mutindu Yandi salaka yawu. Yawu nyonso me mana ntangu yayi, na kutala—na kutala me mana. Na yawu beto kele

na ntangu ya nsuka. Na yawu ya kele samu na yina bima ke na kumonana. Mbote mingi.

¹⁵⁹ Ntangu yayi, Mpangi ya beto bakaka Buku ya mpulusu ya bidimbu sambwadi na Mfumu ya ntete. Mfumu ya ntete... Ntangu beto zimbisaka yawu na disamba ya Eden, na nzila ya Adam, ya vutukaka na Mfumu ya ntete. Kasi ya vwandaka na muzombi ya yimbi na yinsi, nzenza, mpe yina kele Satana; yandi kwizaka, yandi kele muzombi ya yimbi. Ntoto yayi kele ve ya yandi; ya kele ya Nzambi. Kasi yandi kele muzombi ya yimbi, nzenza. Mpangi, mutindu mu lenda tuba kima na ntangu yayi, kasi mu ke sala mbote na kutuba ve. Mukanda ya bumfumu ya mpulusu ya beto kele, Buku ya bidimbu sambwadi yayi. Ya kele mukanda ya bumfumu. Beno vingila tii beto ke kota na Bidimbu yina!

¹⁶⁰ Yandi ke buka bidimbu, ke monisa, ke pesa beto difwa ya Yandi na bantu ya Yandi. Yandi ke pesa difwa yina Yandi byadilaka, na kukumaka Mpangi Mukudi, mpe pesaka beto yawu ya mpamba. Ya kele nyonso ya Yandi. Yandi vwandaka Yandi Yina vulusaka. Kasi na kisika ya kubumbaka yawu ya Yandi mosi, Yandi ke pesa yawu na bantu. Yina kele zola ya Yandi samu na beto. Oh!

¹⁶¹ Satana, muntu yina me kuzwa yawu ntangu yayi, nzenza, yandi kele na nsuka... Yandi zola ve kupesa yawu na nswalu, beto ke mona awa mwa ntama fyoti na Masonuku, mu ke na kubanza awa na kapu yankaka. Mpe yandi zolaka ve kubika yawu, kasi yandi zolaka nwana samu na yawu. Kasi, na nsuka, ntangu ba nataka yandi na kisika ya kumekama, ba losaka yandi na dyanga ya tiya. Ya kele kieleka.

¹⁶² Yesu, Nkumbu ya Yesu na Bansangu ya mbote kele na bisalu yiya ya “Mwana.” Beno zaba yawu? Yesu kele na bisalu yiya mutindu *Mwana* na kati ya Nsangu ya mbote. Mosi ya yawu kele “Mwana ya David”; mosi ya bawu kele “Mwana ya Abraham”; mosi yankaka, “Mwana ya muntu”; mosi na yankaka, “Mwana ya Nzambi.”

¹⁶³ Ntangu yayi, beno tala mbote. Ntangu Mpangi Mukudi ya beto me kuma Yesu Klisto, Yandi ke kuma Mwana ya David, yina kele Kibiyadi ya kiti ya kimfumu. Nkembo! Yandi ke byadila kiti ya kimfumu na kuvwandaka Mwana ya David. Nzambi tubaka ntama kuna ti Yandi ke bika ata mbala mosi ve David, “ke bika ata mbala mosi ve David kukondwa nkuna.” Mpe Klisto kele Mwana ya David. Mpe Yandi me kuma Mpangi Mukudi ya beto, mpe ke na kuvingila, ke na kukubika kisika Yandi lenda yala na beto. Mutindu Mwana ya David Yandi kele Kibiyadi ya kiti ya kimfumu.

¹⁶⁴ Mutindu Mwana ya Abraham, Yandi kele Kibiyadi ya kimfumu ya buntinu. Amen. Ya kieleka? Yandi kele Kibiyadi ya kimfumu ya buntinu (Amen!), Palestine mpe nyonso yina kele na

kati ya yandi, “Nkuna ya Abraham.” Yandi vwandaka Mwana ya Abraham.

¹⁶⁵ Mutindu Mwana ya muntu, yinki ke sala Mwana ya muntu. . . Yinki muntu zimbisaka? Yandi zimbisaka ntoto. Na yawu mutindu Mwana ya muntu Yandi keke Kibyadi ya kima nyonso na ntoto. Nyonso yayi yina keke na Yandi mpe Yandi fwana vutula beto yawu, na yina Yandi ke vutuka mutindu Yandi vwandaka. Yandi keke. . .

¹⁶⁶ Ntangu yayi, kuna, mutindu Mwana ya Nzambi Yandi ke byadila bima nyonso. Mutindu Mwana ya David Yandi keke Kibyadi ya kiti ya kimfumu, mutindu Mwana ya Abraham Yandi keke Kibyadi ya kimfumu ya buntinu, mutindu Mwana ya muntu Yandi keke Kibyadi ya ntoto, mutindu Mwana ya Nzambi Yandi keke Kibyadi ya bima nyonso na Mazulu mpe na ntoto. Oh, la la! Yina keke Mukudi ya beto, Mpangi Mukudi ya beto.

¹⁶⁷ Ntangu yayi, beno tala! Oh, yayi ke sala muntu mbote mingi. Yayi keke kisika mu—mu ke kudya ya kieleka. Ntangu yayi, ti beno pesa bantima ya beno na Nzambi baminuti kaka fyoti. Beno kuwa yayi.

¹⁶⁸ Satana keke nzenza, yandi keke ve mfumu ya kieleka ya yayi, mpe yandi me kuzwa bamvula mafunda zole ya kuswana kana yandi keke mfumu ya yawu to muntu yankaka keke mfumu ya yawu. Kasi Klisto kwisaka mutindu Mpangi Mukudi mpe me vulusa na kuvutulaka beto yawu. Kasi Satana me baka yawu. Kasi, beno zaba, na manima ya mwa ntangu fyoti (bitumba yayi ya nene me suka) ba ke losa yandi na dyanga ya tiya. Beno me mona? Ba ke manisa na yandi, mutindu mosi na bayina nyonso ke sambilaka na yandi. Kasi bibyadi ya mpululu ke kwiza na Klisto. Ntangu yayi, yandi keke nzenza.

¹⁶⁹ Ntangu yayi, beno bambuka moyo, na Ngwisani ya Ntama, kana muntu zimbisa difwa ya yandi mpe ti nzenza kwiza na ntoto ya yandi, yandi zolaka simba yawu ve bilumbu mingi dyaka samu na kubwa ya mfumu ya yawu tii bamvula makumi tanu. Na manima ya bamvula makumi tanu, na mvula—mvula ya Jubilé. Mpe mvula ya Jubilé, ntangu mvula ya Jubilé vwandaka kwiza, kuna bima nyonso vwandaka vutuka dyaka na mbandukulu ya yawu ya ntete. Bampika nyonso, bawu vwandaka vutuka na mbandukulu ya ntete. Kana muntu vwandaka katula matiti na bilanga mpe mpungi me bula mpe ti yandi me kuwa yawu, yandi ke losa nsengo mpe ke tuba, “Mu keke dyaka mpika ve, mu ke vutuka na yinzo na dikanda ya muntu.” Ba vwanza vutula nyonso. Kana nzenza vwandaka na lupangu, yandi zolaka bika lupangu. Kaka yina. Yandi vwandaka bika lupangu samu na yinki? Mfumu ya kieleka vwandaka vutuka. Yandi zolaka kwenda.

170 Alleluia! Mosi ya bilumbu yayi bimfumu ya yinza yayi ke kubwa, mpe bamfumu ya kieleka ke kwiza mosi ya bilumbu yayi. Amen.

171 Ntangu yayi, ya vwandaka na ntangu ya vwandaka kuswana. Na kilumbu ya makumi na yiya, na mbandukulu ya kilumbu ya ntete ya mvedolo ya sanctuaire, to Klisto kwendaka na Calvaire, ya vwandaka na bilumbu makumi yiya tii nzanguka. Ya vwandaka na kuswana, kana kimvuka ya Satana ke baka yawu mpe ke tuba ti Yandi me vumbuka ve na lufwa. Bawu bandaka na kusamuna kuna mpe vwandaka tuba, na kutubaka, “Ya kele bilandi me kwiza mpe me yiba Yandi na mpimpa.” Beno ke tangaka Biblia, “Mpe yandi tubaka ti ‘bantu ya Yandi—ya Yandi kwizaka mpe yibaka Yandi na mpimpa.’ Mpe futaka basoda mbongo na kutuba yawu.” Kasi kuna ya vwandaka na kati ya kyuvu, muntu nyonso vwandaka na kati ya kyuvu.

172 “Mbote, ya kieleka, ya lendaka vwanda na organisation, kuna, kima nyonso kele ya yawu.”

173 Kasi na kilumbu ya makumi tanu vwandaka Kilumbu ya Pentecote, mpe Mfumu ya kieleka kulumukaka na kati-kati ya bawu (Alleluia!) mpe lakisaka ti ya vwandaka organisation ve. Ti ya vwandaka kufuluka ya Mpeve-Santu. Yina vwandaka lufutu ya Nzambi samu na Dibuundu ya Yandi ti ba ke yala yawu ve na ba-organisation mpe nyonso yina, ya ke vwanda lufutu ya mbotika ya Mpeve-Santu na ngolo mpe luzolo ya Nzambi. Amen! Oh, ya ke sala kima mosi ve na beno? Muntu ya kuzwa ya kieleka! Wapi kisika ya vwandaka? Na maboko ya Nzambi. Mpe na . . .

174 Beno me mona, yandi zolaka simba yawu ve kulutila bilumbu makumi tanu. Beno ke tanga yawu kuna na—na Levitique—na Levitique, na—na misiku kuna. Ya ke tuba ti bawu zolaka ve . . . mfumu ya kieleka. Ya zolaka vutuka na maboko ya mfumu ya kieleka na manima ya bamvula makumi tanu. Beto nyonso zaba yawu. Beno me tangaka yawu bambala mingi, kasi . . . beno me mona, “Ya zolaka vutuka na mfumu ya kieleka na manima ya bamvula makumi tanu.”

175 Mbote, na yina, na manima ya bamvula makumi tanu yayi, mvula mosi . . . kilumbu mosi zola kutuba mutindu mvula mosi. Mpe kubanda kilumbu yina ba komaka na kulunsi ntangu bawu bakaka . . . Mpangi Mukudi yayi mpe kufwaka Yandi na—na kilumbu ya Paki, ya vwandaka na kuswana kuna. Dibuundu kwikilaka na ntangu yina ti Yandi vwandaka Mpangi Mukudi, “Yandi vwandaka Mukudi.” Kuna yinki ya salaka? Ya kufwaka Yandi, mbeni salaka yawu, mpe tubaka ti bawu bakaka nzutu ya Yandi mpe bumbaka yawu kisika mosi ntama. Mpe yina nyonso vwandaka ntembe na bantu, “Yinki salamaka na Yandi? Yinki salamaka?”

176 Ntangu yayi, na nsuka ya kilumbu ya makumi tanu, kuna, beno me mona, ya zolaka vwanda dyaka ve kuswana. Kuna,

Nzambi...Na kisika bawu kukwenda—kulandila kukwenda na dibuundu ya ntama ya orthodox, ya madidi, ya kilo; Nzambi me vutula Mpeve-Santu, basisaka banzenza nyonso, mpe kuna yalaka yawu. Ngolo ya Mpeve-Santu kulumukaka mpe Dibundu kuzwaka lufutu ya mpulusu ya yandi.

¹⁷⁷ Ntangu yayi, bampangi, ve samu na kunyongisa kuwa ya beno to kima mosi samu na yawu, kana organisation kele mbote mpe ti beno kele kaka muntu ya Katolika na nzila ya organisation, beno kele Baptiste na nzila ya organisation, beno kele ya kuzimbana. Beno me mona, lufutu ya mpulusu ya beto vwandaka ve kukota dibuundu mosi, lufutu ya mpulusu ya beto vwandaka ve samu na organisation mosi. Lufutu ya mpulusu ya beto kele mbotika ya Mpeve-Santu kukondwa organisation mosi! Amen.

¹⁷⁸ Bawu zolaka simba yawu ve samu na yawu, kuluta kilumbu ya makumi tanu yina, samu ti yina vwandaka kilumbu ya Jubilé ntangu bima nyonso vutukaka na mbandukulu ya yawu ya ntete. Mpe ngolo ya Nzambi kuvutukaka na ntete ya yawu, kilumbu ya makumi tanu, mvula ya Jubilé ntangu bima nyonso vutukaka.

¹⁷⁹ Ntangu yayi, ya ke vwanda na mvula yankaka ya Jubilé mpe, yina, beto me kuma kaka na kutala na ntangu yayi. Kana beno tala, Pentecote me kubwa na Amerika bamvula makumi tanu, kisika mosi na ntangu yina. Kaka pene ya bamvula makumi tanu me luta Pentecote bandaka na kubwa. Ntangu yayi yinki ke na kusalama, dibuundu ke na kuzwa Buku ya bidimbu sambwadi ya luzayikisu ya Yesu Klisto (ya Bidimbu Sambwadi) mpe ata mosi ve ya kumi ya yawu lenda yamba Yandi.

¹⁸⁰ Kasi ntangu beno ke banda na kumona mvula ya Jubilé kisika beto fwana sala mambu mpe kupetekisa mpe kubenda mutindu yayi ve, kasi beto kele yimeni ya kukeba na Klisto! Beto kele yimeni na Nkumbu ya Mfumu Yesu Klisto na mbotika. Beto kele na mansweki nyonso yayi ya nene yina beto ke nata na Bidimbu Sambwadi yayi, mpe kusiamisa na beno ti ya vwandaka bidimbu yina vwandaka ya kukangama na meso ya bantu. Ti Nzambi vwanda kisadisi ya munu, mu ke lakisa beno ti bawu zolaka mona Yawu ve na nzila ya Biblia (Na yina, kieleka, kana Biblia me tuba yawu beno ke kwikila yawu.), ti bawu zolaka mona kima ve kasi “Tata, Mwana, mpe Mpeve-Santu” tii ntangu yayi. Bawu zolaka mona yawu ve ya vwandaka ve na difelo ya Seko, tii ntangu yayi. Bawu zolaka mona ve ti ya vwandaka na nkebolo ya Seko na kon- . . . mu zola kutuba samu na mukwikidi ya kieleka. Ya kieleka, ya vwandaka na kuseka ya yawu bisika nyonso, muningu ya mbote ve yina ba ke pesa. Ya kele samu na yina bantu. . . Bawu ke tuba, “Kasi, beno tala ba-Presbyterien mpe nyonso yina, kunwa fumu, kunwa malafu, mpe nyonso yankaka yina, mpe kutuba ti bawu kele na nkebolo ya Seko.” Yinga, kasi, beno me mona, yina kele—ya kele samu na kulosa Mpungi ya kieleka.

¹⁸¹ Beto vutuka Awa mpe beto tala kana Mpungi wakanaka, kana beno ke vutuka ve Genèse tii Apocalypse, manima mpe mantwala, ntangu kidimbu yayi me zibuka; beno me mona, bima yayi me monisama.

¹⁸² Ntangu yayi, oh, mpangi! Mu banzaka ti mu vwandaka kaka. . . Mu ke bika yawu na lweka tii kilumbu yankaka yina mu ke kwiza awa. Mu kele dyaka na ba-page sambanu awa; to—to, ok, ve, beto kele na lukutakanu ya mbotika ke na kwiza. Beno bika mu tanga yayi, mwa zole ya bima yayi awa, mvula ya Jubilé. Mbote mingi.

¹⁸³ Ntangu yayi, beno—beno nyonso ke na kusonika Masonuku? Na Jérémie kapu 32, mpe kubanda na nzila ya 6 kana beno. . . mpe ntangu beno ke kuma na yinzo, kana beno zola kutanga yawu. Ntangu yayi, Jérémie, samu na kumonisa beno yina rouleau yayi kele, mu ke basisa yayi. Beto baka rouleau, na mutindu nyonso. Yina ke pesa munu pene ya baminuti kumi, na rouleau. Ntangu yayi, beno bambuka moyo, Buku yayi vwandaka ya kukangama. Ntangu yayi, buku na bilumbu ya Biblia vwandaka ve buku na bansongi yiya mutindu *yayi*. Ya vwandaka buku mutindu *yayi*, ba vwandaka bokila yawu buku, “rouleau.” Bantu yikwa zaba yawu? Uh-huh. Ya kieleka, ya vwandaka rouleau. Mbote mingi.

¹⁸⁴ Ntangu yayi, Buku yayi—yayi vwandaka ya kukanga na bidimbu sambwadi. Ntangu yayi, Yawu vwandaka Biblia mpe Yawu vwandaka na bidimbu sambwadi. Mpe beno ntangu yayi beno tala mbote mutindu yayi kusalamaka.

¹⁸⁵ Jérémie, ntangu yandi—ntangu yandi zolaka vwanda. . . yandi pesaka profesi ti ba ke nata yandi. Na Jérémie ntangu yayi, kapu ya 32. Ba zolaka nata yandi na kimpika na Babylone, ba zolaka vwanda kuna bamvula makumi sambwadi. Yandi pesaka profesi yawu. Mpe beno mitangi ya Biblia me lutilaka na yawu bambala mingi. Mpe ba zolaka nata yandi kuna bamvula makumi sambwadi. Mpe yandi—yandi vwandaka mpangi ya pene-pene na leki ya yandi yina kufwaka. Lekhi ya yandi (H-a-n-a-m, ba-e zole, l) Hanameel, Hanameel, Hanameel, yandi vwandaka. . . mpangi ya yandi yina landaka. Na yawu yandi zabaka ti—ti mbeni ke simba mikanda mpe nyonso yina ya kisika ya yandi, kasi ntangu. . . Yandi zabaka ti Nzambi zolaka bika ve bantu ya Yandi, na yawu ntangu bawu vutukaka, ti yandi vwanda mpe kuvwanda mfumu ya kulunga ya difwa, awa kele yina yandi salaka: yandi yidikaka nyonso.

¹⁸⁶ Bantu yikwa me tangaka ntete yawu? Mbote mingi, beno me tangaka yawu, na yina beno me tangaka yawu. Mbote mingi. Ntangu yayi, yandi bakaka mpe kangaka kaka yawu kieleka mutindu ba-rouleau yayi vwandaka ya kukanga awa. Ya kele kima mosi ya kulutula kitoko, kima ya kulutula mbote yina beno me monaka ntete ve.

187 Ntangu yayi, mu ke meka na kusala kifwanukusu na yawu na kitini yayi ya mukanda, mu zaba ve kana mu lenda to ve. Ntangu yayi, awa kele mutindu ba sonikaka yawu, mutindu *yayi*. Ntangu yayi, yandi salaka yawu mpe yandi kangaka yawu mutindu *yayi*, mosi na mosi na yisi. Ntangu yayi, yinki salamaka, na mosi na mosi ya bidimbu yayi ba sonikaka awa difwa ya yandi mpe yina salamaka, mpe bayina nyonso kubwaka na ntuala ya yandi mpe mutindu yandi kwizaka samu na kubyadila yawu. Ya vwandaka nyonso ya kukangama mutindu yina.

188 Ntangu yayi, ya kele mutindu Nzambi me kuzwa Buku ya Yandi ya bidimbu sambwadi. Ntangu yayi, kaka na yina Yandi me katula yayi, luzayikisu yina me kwiza mbala mosi mpe me kwenda nzila nyonso tii na manima ya Buku. Ya kele samu na yina beno lenda baka Nkumbu ya Yesu Klisto mpe kubaka Yawu kubanda Genèse tii Apocalypse mpe kulakisa ti ya kele ve na kima mutindu “Tata, Mwana, mpe Mpeve-Santu.” Beno me mona? Beno me mona, ya ke tambula nzila nyonso na kati ya Biblia, Yawu ke monisa yawu.

189 Na yina beno baka mutindu, “Ya kele na difelo ya Seko.” Beno baka yawu mpe beno nata yawu nzila nyonso; ya vwandaka ata mbala mosi ve na difelo ya Seko samu ti na mbandukulu Nzambi tubaka ti difelo *kuvangamaka* samu na dyabulu mpe bawanzio ya yandi, samu na kitumbu ya bawu ya bilumbu ke kwisa. Na yina kana difelo kele ya Seko, wapi mutindu ba lendaka vanga yawu? Mpova luvangulu ata mbala mosi ve kusalaka . . . Mpova *Seko*, “ata mbala mosi ve kubandaka mpe ata mbala mosi ve lenda suka.” Na yina ya vwandaka ntangu nyonso na difelo kana ya kele difelo ya *Seko*, “ya vwandaka na difelo ntangu nyonso mutindu mosi, ntangu mosi yina ya vwandaka na Nzambi ya vwandaka na difelo, ntete ti disumu mosi kuvwanda ya vwandaka dyaka na difelo.” Huh! Oh, la la! Beno me mona, beno lenda ve kusala yawu.

190 Na yawu beno tala mbote mutindu bima yayi ke zibuka, ya ke vutuka kaka mpe ke zibula Buku. Na yawu ntangu yayi yayi ke pesa kieleka foto ya Biblia ya muvimba, mpe bidimbu yina kele na Biblia yina me bumbama na meso ya bantu ya ndwenga mpe ya mayele. Nzambi, na nzila ya Mpeve-Santu, ke na kuzibulaka yawu mutindu yayi mpe ke na kumonisa yawu kieleka na nzila ya Biblia. Nkembo na Nzambi!

191 Mpangi, mu tuba na beno, yina ke vumbula kaka nsatu ya munu—ya munu ya madya ya kimpeve. Beno me mona? Beno me mona? Ntangu yayi, beno tala awa! Beno me mona, ya kele—ya kele ku- . . . mutindu . . . Beno ke bakula yina mu zola kutuba? Beno me mona, yawu yayi, kidimbu. Ntangu yayi, kana beno tala mbote mpe beno tanga awa, beno kwenda na Jérémie mpe beno mona mutindu yandi—yandi—yandi—yandi kangaka yawu.

¹⁹² Ntangu yayi, Buku yayi, ba me sonika na kati kuna. Ntangu yayi, kaka na ntangu ya luzayikisu ya ntete, kuna Yandi me zibula kidimbu yayi. Ntangu yayi, beno tala mbote mpe beno mona yina kidimbu yina ya ntete vwandaka na ntangu beto ke baka Bidimbu. Na manima na ntangu ya kidimbu ya zole, Yandi ke basisa kidimbu yina me landa. Mpe beno zaba kisika beto kele? Beto kele pene na kidimbu ya sambwadi kaka ntangu yayi. Mpe ntangu ya sambwadi. . .

¹⁹³ Ntangu kidimbu ya ntete kuzibukaka, mpungi ya ntete wakanaka mpe mpasi ya ntete yina me kubwa. Ntangu kidimbu ya sambanu kuzibukaka, ya sambanu kuwakanaka mpe mpasi ya sambanu kubwaka. Beno tala kaka yawu mbote, ya kele kima ya kulutila kitoko yina beno me monaka ntete ve. Mpe ntangu mu ke sala, mu ke kuzwa samu na munu, tablo ya nene mingi, kunata yawu na zulu awa mpe kulongisa kaka yawu awa, samu beto kuzwa kaka ntangu mingi na zulu ya mosi na mosi ya kidimbu mpe kuvutuka mpe kubaka disolo mpe nyonso, mpe kulakisa kaka ntangu ya salamaka, mpe kulakisa kaka awa na kati ya Biblia ntangu Yawu ke tuba ti ya zolaka salama, mpe kaka kieleka ntangu ya salamaka, kaka kilumbu mpe nyonso yankaka. Mu kele na yawu, amen, mu me kuzwa yawu na Yandi. Ya kele kieleka. Beno tala bidimbu.

¹⁹⁴ Ntangu yayi, ntangu Jérémie sonikaka buku yayi, ya vwandaka ya kukanga. . . Beno tala kima ya mbote mu zola ti beno tala, beno nyonso yina tangaka yawu, ti buku ya kukanga yayi. . . Ntangu yayi, beno bambuka moyo ti, yandi zolaka kwenda. Yandi pesaka profesi. Ntangu yayi, yandi zabaka yawu ve, kaka na nzila ya profesi. Beno ke na kulanda munu? Na nzila ya profesi yandi zabaka, na nzila ya luzayikisu ya Nzambi, ti bawu zolaka vwanda ntama ya yinsi yina bamvula makumi sambwadi. Beno ke bambuka moyo na yandi na kupesaka profesi yina? Yandi ke vwanda bamvula makumi sambwadi, bawu ke vwanda na kimpika. Na yawu yandi zolaka ndima ti kidimbu yayi (ti difwa ya yandi) ke vwanda ya kubumba, samu ti yandi vwandaka. . . yandi byadilaka difwa ya leki ya yandi. Na yawu yandi vwandaka na yawu nyonso ya kusonama, na mutindu ya kulunga. Mpe yinki yandi salaka na yawu? Samu ya bola to kuzwa mbungi ve, yandi tulaka yawu na vaze ya ntoto; mpe tulaka yawu na lweka samu ti ya bola to kuzwa mbungi ve, tii bamvula makumi sambwadi yayi kumana.

¹⁹⁵ Nkembo na Nzambi! Mu banza ti beno ke simba yawu! Beno me mona yina Nzambi salaka? Yandi monisaka Yawu ata mbala mosi ve na bantu ya ndwenga mpe ya mayele (samu bawu zolaka sala mambu samu na Yawu na ntangu nyonso yayi), kasi Yandi tulaka Yawu na Vaze ya ntoto mpe Yandi vangaka Yandi mosi Mwana ya Yandi Mosi, Klisto Yesu. Mpe na kilumbu ya nsuka yayi ntangu yayi Yandi ke na kuzibulaka bidimbu mpe ke lakisa yawu na Dibuundu ya Yandi. Bumbaka na Vaze ya ntoto samu

ti Yawu bola to kuzwa mbungi ve! Alleluia! Oh! Mu zaba ti beno ke banza ti mu kele exalté. Ya lenda vwanda ti mu kele. Beno me mona? Kasi Yawu yayi! Ba me bumba yawu na Vaze ya ntoto yina ba vulusaka na kubasisaka na ntoto, kwizaka na suka ya Paki kisika bidimbu ya lufwa zolaka kanga Yandi dyaka ve; kasi Yandi zengaka bidimbu mpe vumbukaka, mpe lakisaka Yandi mosi na bilumbu ya nsuka yayi ti Yandi kele moyo! Yandi kele na kati ya Dibuundu ya Yandi! Yandi kele mutindu mosi mazono, bubu yayi, mpe kukonda nsuka. Mpe ba bumbaka yawu na baseminere, ba bumbaka yawu na ba-organisation.

196 Mpe na bilumbu yayi ya nsuka Yandi ke monisa Yawu na nzila ya Mvwandulu ya Yandi Mosi na kati ya bantu ya Yandi. Yandi ke baka muntu yina Yandi lenda basika yinza na yandi mpe kubasisa bima na yandi (mutindu ya kusambila na yandi), samu Yandi zonza na nzila ya bawu mpe kumonisa mpe kuzibula bidimbu yayi mutindu yayi Yandi mosi. Beno me mona? Alleluia! Oh, beno zola Yandi ve? Oh, la la, oh!

197 Dikani ya beto ya mpulusu, mutindu mosi ntangu yayi yina me monisama na Yesu Klisto. Wapi mutindu Yandi ke monisa na bilumbu yayi ya nsuka? Na nzila ya kidimbu ya Yandi ya kuzibuka. Mbote, muntu ve. . . Beno me kuwaka ntete yawu ve ya kusonama na luzingu ya beno na zulu ya Nkuna ya Abraham, mutindu bawu lutaka na nzila ya kunungisama, kusantisama, mbotika ya Mpeve-Santu; mutindu ti wanzio yina ke kwiza na bilumbu ya nsuka, ke pesa manima ya yandi na dibuundu mpe kutuba kaka kieleka yina Sarah vwandaka banza na kati ya ntima ya yandi kuna (yina vwandaka ve tii bubu yayi, ya kele kieleka, yayi kele kilumbu); mpe lukwikilu ya Abraham; mpe Nkumbu ya Mfumu Yesu.

198 Ntangu yayi, kima mosi awa, mu kele na bima tanu yina mu zola zonzila, kaka sekonde mosi, kaka na nswalu nyonso. Beno tala. Sambwadi. . . Ya kele na bidimbu sambwadi, mpe ya kele na tanu sambwadi ya mpulusu ya Nzambi. *Tanu* kele lutangu ya “lemvo.” Bantu yikwa zaba yawu? Y-e-s-u [J-e-s-u-s—Mu.], l-u-k-w-i-k-i-l-u [f-a-i-t-h—Mu.], tanu kele lutangu ya lemvo. *Sambanu* kele kilumbu ya muntu, mpe *sambwadi* kele kilumbu ya yandi—ya yandi ya mpulusu.

199 Ntangu yayi, beno tala mbote. Ntangu yayi, ya kele na bidimbu sambwadi na kati ya yayi, to—to bitezo sambwadi na dikani yayi ya nene ya mpulusu. Ya kele na sambwadi yinki? Bidimbu sambwadi ya mpulusu, Bampeve sambwadi ya Nzambi. . . Beto ke tala ti (kana beno zola kumona kana ya me tuba “Bampeve Sambwadi,” beno bika mu tala awa minuti kaka), kapu ya 5, kubanda na nzila ya 6 (mu banza, beto ke mona awa), na nzila ya 6:

*Mpe . . . tala, mpe, tala, na kati-kati ya kiti ya kimfumu
mpe ya bibulu yiya, mpe na kati-kati ya bakuluntu,*

vwandaka ya kutelama Mwana-dimeme mutindu yina ba me kufwa, yina vwandaka na bayintu sambwadi mpe meso sambwadi, yina kele Bampeve sambwadi ya Nzambi yina ba fidisaka na ntoto nyonso.

²⁰⁰ Yinki kele Bampeve sambwadi yina? Minati-nsangu sambwadi yina. Ya kele na Santu Colomban, mpe Irénée, mpe—mpe John Wesley, mpe Martin Luther, mpe nyonso yina. Beno me mona, “Bampeve sambwadi,” yina kele bantu sambwadi (bawanzio sambwadi), yina kele bansangu sambwadi.

²⁰¹ Bidimbu sambwadi, Bampeve sambwadi, bawanzio sambwadi, bibongo sambwadi, mpe mabuundu sambwadi. Beno me mona, sambwadi basambwadi, ya kele na basambwadi tanu, na yina, *sambwadi* kele “kulunga,” *tanu* kele “lemvo,” Lemvo ya Nzambi na Bansungi Sambwadi ya Dibuundu. Bantu ya Yandi minati-nsangu sambwadi, Bampeve sambwadi ya Yandi ya Nzambi, bidimbu sambwadi ya dikani ya mpulusu (beto kele na kati malu-malu yayi), *bibongo* sambwadi zola kutuba “bansungi” sambwadi.

²⁰² Samu, *mpoka* zola kutuba “kimfumu.” Beno bambuka moyo na yimpu kwizaka na zulu ya kibulu (mpoka) na Daniel, mpe nyonso yina? Beno me mona, ya zola kutuba kimfumu, to “bansungi sambwadi.” Mpe, beno bambuka moyo, Yesu tubaka, “Bayankaka lalaka na mpimpa ya ntete, nsungi mosi; mosi yankaka na mpimpa yina landaka, nsungi yina landaka; yina landaka; mpe yina landaka; tii mpimpa ya sambwadi. Mpe na mpimpa ya sambwadi Bakala ya makwela kwizaka, mpe bawu nyonso vumbukaka.” Beno ke bambuka moyo na yawu?

²⁰³ Na yawu “bansungi” sambwadi vwandaka *bibongo* sambwadi, mpe *mabuundu* sambwadi, to “sambwadi na- . . . bilumbu ya nzutu ya mikwikidi.” Oh, Ya kele kaka ya kulunga mutindu ya lenda vwanda. Jérémie . . . Oh, “Buku,” “bansungi,” mutindu ba vulusaka yawu! Mutindu . . . [Kisika ya mpamba na bande—Mu.] . . . kaka awa.

²⁰⁴ Sambwadi mpe mosi ya nsuka ya bidimbu yayi, ntangu ba zibula yawu, ya kele na Apocalypse kapu ya 10, ya vwandaka na Wanzio mosi ya ngolo (yina vwandaka Klisto) kulumukaka mpe tulaka dikulu mosi na ntoto mpe mosi na mubu, mpe telemisaka diboko ya Yandi mpe kutuba, “Kilumbu me manisa. Ntangu me suka. Nyonso me mana. Ntangu ke vwanda dyaka ve.”

²⁰⁵ Mpe Yandi tubaka, “Na muningu ya . . . na ntangu yayi, mansweki ya Nzambi ke mana.” Nani Nzambi kele mpe wapi mutindu Yandi talanaka; wapi mutidnu ntangu kidimbu yina kuzibukaka, wapi mutindu beto bandaka na kubakula ntangu yayi mutindu Yandi vwandaka Mwana ya Nzambi, Yandi vwandaka Nzambi Yandi mosi na nsuni; mpe luzayikisu ya Nani Yandi kele; yina ke mana ntete ti Wanzio yayi kutula makulu ya Yandi na zulu ya ntoto mpe mubu mpe zengaka ndefi ti “ya ke

vwanda dyaka ve na ntangu” ntangu ntangu yayi ke kwiza. Beto me kota na yawu yimeni ntangu yayi. Beno me mona?

206 Mosi ya bawu ya nsuka kele Apocalypse 10, “Dikulu na zulu ya ntoto mpe na zulu ya mubu,” ntangu me suka, mpulusu me mana, mpe ntangu yayi Yandi ke kwiza mutindu Nkosi. Yandi vwandaka Mwana-dimeme kuna, ntangu yayi Yandi ke kwiza mutindu Nkosi ya dikanda ya Juda.

207 Ntangu yayi, beno bika kaka munu kutanga yayi yina me bikana samu mu natila beno yawu na nswalu nyonso ntangu yayi, mpe nzila ya 8:

Mpe ntangu yandi bakaka buku, bibulu yiya mpe makumi zo-...mpe yiya mpe makumi zole ya bakuluntu fukamaka na ntwala ya Mwana-dimeme, na kuvwandaka mosi na mosi ya bawu na bansambi, mpe bambungu ya wolo ya kifuluka na mananasi, . . . mpe balusambulu ya basantu.

208 Ntangu yayi, yayi kele ntangu yina bima nyonso fwana vwanda na lusambulu. Ntangu yayi, beno bambuka moyo, mutindu ya kulunga. Ntangu yayi, ti beto kondwa yayi ve ntangu yayi. Beno kuwa mbote-mbote. Ntangu mansweki nyonso ya nsungi ya dibuundu sukaka, ntangu mansweki nyonso ya makani ya mpulusu, bidimbu sambwadi yayi kuzibukaka na . . . kaka na nswalu-nswalu na manima ya yayi ntangu yayi, beno tala, ya kele ntangu samu—samu na nyonso, kima nyonso na Mazulu mpe nyonso na zulu ya ntoto na kusambila Nzambi. Ntangu yayi, beno tala mbote yina ke salama. Beno kuwa na . . . kele, beno kuwa kaka yayi minuti:

Mpe bawu yimbaka nkunga ya malu-malu, na kutubaka, Nge kele ya kulunga . . .

209 Beno kuwa wapi kusambila yayi vwandaka! Bakuluntu, bibulu, nyonso kubwaka kaka na ntwala ya Yandi, beno me mona, mutindu yina, ntangu Yandi salaka dikani ya Yandi ya muvimba. Ya kele ntangu ya kusambila ntangu yayi, beno me mona:

Mpe bawu yimbaka nkunga ya malu-malu, na kutubaka, Nge kele ya kulunga na kubaka buku, mpe na kuzibula bidimbu ya yawu: samu ti ba kufwaka nge, mpe nge me vuukisa beto samu na Nzambi na menga ya nge konso dikanda, . . . ndinga, mpe bantu, mpe yinsi;

Mpe Nge me sala beto samu na Nzambi ya beto bantinu mpe banganga-Nzambi: mpe beto ke yala na ntoto. (Beno kuwa, myoyo ya kuvuuka yina ke na kudilaka kuna. Hmm!)

Mpe mu talaka, mpe mu kuwaka ndinga ya bawanzio mingi pene ya kiti ya kimfumu mpe bibulu mpe bakuluntu: mpe lutangu ya yawu vwandaka mafunda

kumi na bambala mafunda kumi, mpe mafunda ya mafunda; (Bima nyonso na Mazulu ke na kusambila Mwana-dimeme yayi, beno me mona.)

Na kutubaka na ndinga ya ngolo, Ya kulunga kele Mwana-dimeme (Alleluia! Alleluia!) yina kufwaka samu na kuzwa ngolo, mpe bimvwama, mpe ndwenga, mpe ngolo, mpe buzitu, mpe nkembo, mpe lusakumunu.

210 Beno kuwa, “Mpe konso kivangu!” Beno kuwa yinki Jean salaka:

Mpe konso kivangu yina kele na mazulu mpe na . . . ntoto, mpe na yisi ya ntoto, mpe mutindu kele na mubu, mpe nyonso yina kele na kati ya bawu, kuwaka munu (Jean) kutuba, balusakumunu, . . . buzitu, . . . nkembo, . . . ngolo, kuvwanda na yandi yina me vwanda na kiti ya kimfumu, mpe na Mwana-dimeme ntangu nyonso mpe mvula na mvula.

211 Jean zolaka kuzwa ya kieleka na Pentecote ya yandi mosi. Yandi tubaka, “Konso kivangu na Mazulu, konso kivangu na ntoto, konso kivangu na yisi ya ntoto, konso kivangu vwandaka na mubu, kuwaka munu kutuba, ‘Amen, nkembo, buzitu, ngolo, mpe balusakumunu, kuvwanda na Yandi yina kele ya kuvwanda na zulu ya Kiti ya kimfumu, Mwana - dimeme yina.’”

212 Ntangu ya kusambila! Amen! “Wapi mutindu bawu salaka yawu?” Beno tala Ndinga ya Yandi, beno . . . bawu nyonso kuwaka yawu.

Mpe bibulu yiya tubaka, Amen. Nge kele na foti ve, Jean, boka kaka mpe kembila Yandi na ngolo nyonso yina nge lenda. Yawu . . .

. . . kuwaka munu kutuba, balusakumunu, Amen, nkembo, ndwenga, ngolo, mpe lenda . . .

. . . Mpe bakuluntu makumi zole na yiya fukamaka mpe sambilaka yandi yina vwandaka . . . yina ke zinga ntangu nyonso mpe samu na ntangu nyonso.

213 Wapi mutindu ya disolo ya kitoko! Ntangu yayi, mu kele na ntangu ve. Mu kele na yawu ya kusonika, dibanza mosi na zulu ya yawu awa, kasi lukutakanu ya beto yina ke landa ntete beto kota na yayi . . . Mu banza ti ntangu mu ke katuka na konze ya munu to kilumbu mosi, Mu zola baka basabala makumi sambwadi yayi ya Daniel mpe kuvukisa kaka yawu na kati awa, mpe kulakisa yawu kisika ya ke nata yawu na Jubilé ya Pentecote, mpe ke vutula kaka yawu na basambwadi yina ya bampa- . . . bidimbu sambwadi yina ke zibuka awa kaka ntete beto kwenda, mpe ke lakisa ti ya kele na nsuka, bayayi . . .

214 Mwana ya dimeme, Mesiya, Mwana ya ntinu ya bakala ke kwiza mpe ya ke vwanda na basabala makumi sambwadi (ya kele bamvula sambwadi) yina pesamaka na profesi samu na bantu

ya Yandi. Mpe ba ke katula Mwana ya ntinu ya bakala na kati-kati ya ntangu, ya kele tatu mpe ndambu, ndambu ya sambwadi kele tatu mpe ndambu, ba ke katula. Mpe munkayulu ya konso kilumbu ke suka; mpe busafu yina ke pesaka kyadi (ya zola kutuba Mosquée ya Omar kele ya kutelama bubu yayi na kisika ya tempelo ntangu bawu yokaka tempelo), mpe kuna ya kele dyaka na bamvula tatu mpe ndambu yina me bikana na Israel.

215 Mpe Klisto kwizaka mpe longaka mpe pesaka kaka kieleka profesi bamvula tatu mpe ndambu, mpe ba katulaka munkayulu ya konso kilumbu, nyonso kaka ya kulunga mutindu ya zolaka vwanda. Mpe Mosquee ya Omar vwandaka kaka... kutungamaka na bisika mosi mpe kele ya kutelama kuna tii bubu yayi. Mpe ba ke dyata bibaka ya Jérusalem tii ntangu ya Bantu ya makanda ke mana, ba me zangula Dibuundu (Musolami, Kento ya makwela) kuna.

216 Mpe baprofete zole, Elie na Moise, ke kwenda na Israel samu na bamvula zole yankaka yina mpe zole mpe ndambu... bamvula tatu mpe ndambu. Ya kele kima ya kulutula kitoko ntangu beno ke mona yawu kubasika.

217 Beno zola Yandi? Na ntima ya beno nyonso? Beno me bakula ntangu yayi yinki vwandaka Buku ya bidimbu sambwadi? Yinki Yawu kele: beto ke na Yawu, “na rouleau,” ntangu yayi. Mpe beno bambuka kaka moyo, kaka na bilumbu ya nsuka yayi... Yawu kubumbamaka na Vaze ya ntoto. Beno me bakula yawu ntangu yayi? Mpe Nani vwandaka Vaze ya ntoto yina? Yesu Klisto. Muntu ve vwandaka na Yawu, muntu ve kuzwaka Yawu, ya kele kaka na nzila ya Yandi. Yawu sonamaka ve na kati ya Ndinga. Kana Yawu vwandaka ya kusonama na kati ya Ndinga, yawu vwandaka ya kubumbama samu ti beno kumona Yawu ve. Ya kele kieleka. Na yawu ya kele na kati ya Yandi ti Yawu kumonisaka, mpe na kati ya Vaze ya ntoto yina samu ti Yawu kubola mpe kubasika mbungi ve.

218 Mpe na manima Yandi ke kwiza mpe ke nata muntu ya Dibuundu ya Yandi, mpe ke tuba, “Beno me mona, mu kele mutindu mosi mazono, bubu yayi, mpe kukondwa nsuka. Beno me mona? Beno me mona? Ntangu yayi, beno ke kukiyufulaka ntangu nyonso kana—kana musumuki ya mputu ke nyenga ya Seko to ba ke kufwa kaka yandi na manima ya bamvula fuku. Yawu yayi. Ya kele mutindu ya vwandaka. Ya kele ve na kima mutindu difelo ya Seko. Ya lendaka vwanda ya Seko ve, samu mu... difelo vwandaka ve na Munu ntangu mu bandaka kuna. Mu salaka yawu samu na kusemba yimbi. Beno me mona? Beno kele na boma ya yinki, beno me mona, samu na Nkuna ya Abraham mpe bima nyonso yayi yankaka? Kaka...” Ya kele kaka—kaka dibanza ya yawu, beno me mona, kasi ntangu beno ke kota na mutindu Nzambi ke zibula bidimbu ya yawu, mpe kulakisa yawu, yina me salama; beno me mona, ntangu beno ke

sala yawu, na yina beno lenda ve kukwenda ntama na Buku yayi. Bidimbu yina . . .

219 Beno ke tuba, “Oh, kidimbu zola kutuba kima yankaka, Mpangi Branham.”

220 Vingila fyoti! Yawu fwana kufwanakana na Yayi, samu ti ba kangaka yawu na manima ya yayi samu na kumonisa Yayi. Ya kele . . . Yinki ya kele? Yinki ya vwandaka? Awa, mutindu awa, Jérémie. Beno ke tuba ti kima *yayi-yayi* me salama; kana beno basisa *yayi*, awa kele kisika ya kele. Mbote mingi. Beno ke bebisa *yina* mpe ke tala awa na manima, beno tala kisika yandi me tanga yina salamaka. Mbote mingi. Nge ke bebisa *yayi* awa, beno ke tala awa, mpe yawu yina salamaka. Beno me mona, ya kele kima mosi yina Buku yayi kele, beno me mona, na manima ya yawu.

221 Bawu ke tuba, “Mbote, mu lenda bakula ve. Bayankaka ke tuba, ‘Tata, Mwana,’ mpe bayankaka, ‘Mpeve-Santu,’ mpe bayankaka ke tuba, ‘Nkumbu ya Yesu,’ nyonso mutindu yina.”

222 Ya me vwanaka ya kubumbama bamvula nyonso yayi. Kasi ntangu yayi yandi yayi, yandi ke vutuka, ya ke vutuka na manima samu na kulakisa ti ya kele kaka na Nzambi mosi. Vwandaka ata mbala mosi ve kasi Nzambi mosi. Ya kele kieleka. Mpe Nkumbu ya Yandi . . .

223 Ya kele mutindu Buku ya Matthieu, 28:19, “Na yawu beno kwenda, mpe beno longa bayinsi nyonso, na kubotikaka bawu na Nkumbu ya Tata, Mwana, Mpeve-Santu,” mpe Tata kele ve nkumbu, mpe Mwana kele ve nkumbu, mpe Mpeve-Santu kele ve nkumbu. Ntangu yayi, wapi mutindu beno ke botika bawu? Na wapi nkumbu ya bawu beno ke kubotika, na yina ya kele ve bankumbu? Na yina yinki? Beno ke botika ve na nkumbu mosi, kuna. Yina kele Lukolo ya Baprofete dyaka, beno me mona.

224 Na yina beno vutuka na kisika yayi awa, mpe beno baka awa mpe beno vutula yawu mpe beno vutuka na Matthieu 1, yinki Yandi ke sala? Beno katula kaka yawu mpe me vutula yawu awa:

Ntangu yayi Yesu Klisto butukaka mutindu yayi: (Banzambi tatu ve, ntangu yayi, beno me mona.) Na yina mama ya yandi . . . vwanaka fianse na Joseph, ntete bawu kuvwanda kintwadi, yandi kuzwaka kivumu ya Mpeve-Santu. (Nzambi Tata ve; “Mpeve-Santu.” Huh?)

. . . nyonso yayi kusalamaka, ti . . .

Mpe Joseph bakala ya yandi, . . . muntu ya mbote, . . . zolaka ve kutalisa yandi nsoni na meso ya bantu, vwanaka yindula na kufwa makwela na yandi na mansweki.

. . . na bima yayi, . . . na yina yandi vwanaka banza na . . . beno tala, wanzio ya Mfumu monikaka na yandi na ndosi, na kutubaka, Joseph, nge mwana ya David,

kutala boma ve . . . kubaka na nge Marie kento ya nge: samu ti kivumu yina kele na yandi kele ya Mpeve-Santu . . . (Nzambi Tata?) . . . Mpeve-Santu.

225 Mu banzaka, “Nzambi Tata vwandaka tata ya Yandi.” Mu ke na kutuba yayi samu na mbotika yina ke na kwiza. Beno me mona? Mu banzaka, “Nzambi Tata vwandaka tata ya Yandi.” Ntangu yayi, to Mpeve-Santu mpe Nzambi Tata kele Mosi, to Yandi vwandaka na batata zole; na yina Yandi kele mwana ya makangu, mpe kuna wapi mutindu ya Nzambi kele na beto? Hmm? Beno me mona?

Mpe . . . nyonso yayi kusalamaka, ti ya kulungisa . . . Mfumu kuzonzaka na nzila ya profete, . . .

. . . mwense mosi ke kuzwa kivumu, mpe ke buta mwana ya bakala, . . . ba ke bokila yandi Yesu, . . . (Ya kieleka?) . . . Mpe ba ke bokila Yandi Emmanuel, yina . . . kutuba, Nzambi na beto.

226 Ntangu yayi, beno me mona, ntangu Yandi zibulaka kidimbu, yinki kele kima nyonso na Matthieu kapu 1te (beno vutuka)? Mbote, Yesu Klisto. Yawu yina kaka Pierre tubaka na Kilumbu ya Pentecote. Yawu yina bawu nyonso yankaka tubaka.

227 Samu ti, nkonga yayi ya ba-Romain zolaka kwiza mpe kutuba, “Oh, ve! Beto fwana vwanda na Banzambi tatu. Beto fwana . . .” Bawu kele na mafunda kumi ya yawu ntangu yayi: ya kele na Marie mpe Santu Cecile, mpe Santu Marc, mpe Santu *Kingandi*. Mpe mu banza ti ya kele na bankama tanu mpe kima mosi na Mexico City. Ba kufwaka kento mosi mwa bilumbu me luta na mosi ya baya yandi ya zola, mpe bawu kotaka na kunwana samu na yandi mpe bawu kufwaka yandi, na yawu bawu me sala yandi santu, mpe bantu ke balula ntima na yandi, mpe nyonso mutindu yina. Bundoki!

228 Mpe awa dibuundu ya ba-Protestant me kwiza na yina bawu ke bokilaka Credo ya Bantumwa, “Mu ke kwikila na Nzambi Tata ya Ngolo nyonso, mukengi ya mazulu mpe ya ntoto, mpe—mpe dibuundu ya Santu ya Katolika ya Rome. Mpe mu ke kwikilaka na kusambila ya basantu, mbundana ya basantu.” Ba-protestant ke na kutuba na yisi ya ndefi ya Nzambi, ti yandi ke kwikilaka na mbundana ya basantu. Yina kele bundoki! Beno me mona? Na yina bawu ke kwenda na ntwala mpe ke sala yawu, kieleka, samu ti dibuundu me tuba mutindu yina. (O Nzambi, wapi mutindu mu kele na kyese na kuzaba yina mu zaba! Wapi mutindu mu kele na kyese na kuzaba yina mu zaba!) Bawu zaba ve ti bawu ke na kukangamaka bawu mosi ntama kaka na Nzambi, kuna na mpimpa. Mpe beno lenda ve kutuba na bawu, samu ti bawu lenda kwandi ve kumona yawu.

229 Mu zola kuyufula . . . muntu ve fwana tuba yayi. Ya kele na bantu keba ve kumi na tanu to makumi zole, yina kele ya kuvwanda kaka awa, bayina zabaka dyambu na kubanzaka ti

mu vwandaka Yesu Klisto. Wapi mutindu bawu lendaka sala yawu? Mu vwandaka dasuka na bawu tii ntangu mu monaka ti Nzambi tubaka na munu “ti ya vwandaka mpeve.” Mpe bantu yina, mu tubaka. . . Mpe bantu yina kwikilaka munu, konso ndinga. Mu tubaka, “*Wapi mutindu* beno ke kwikila na munu na ntangu yina, kana mu tuba na beno?” Na yina beto kwendaka na Ndinga, kuna bawu bandaka na kumona, bawu tubaka, “Mbote, ya kieleka, beto kwikilaka nge ve to beto vwandaka kuwa yina nge tubaka.” Beno me mona kuna?

²³⁰ Kasi kieleka bawu banzaka ti bawu vwandaka ya kusungama, na mutindu ya kieleka. Beno me mona? Mpe mosi ya bampeve yina ntangu yandi ke kwiza na zulu ya beno, yawu yina, beno me mona, kieleka beno ke kwikila yawu. Mu ke kipe ve, beno. . . muntu ve lenda tuba na beno mutindu yankaka. Beno me mona? Ata wapi mutindu Ndinga ke tuba yawu, mbote, beno ke kwikila Yawu kaka ve; beno kwenda kaka na ntwala. “Kana beno zola kuvwanda mutindu yina, beno kwenda na ntwala, mpe mu ke kuzwa nzila ya munu mosi.” Beno me mona, yina ke lakisa ti beno kele ya kupakula na mpeve ya yimbi.

²³¹ Mpeve ya Nzambi ke-. . . Mbote, beno ke tuba, “Wapi mutindu na nge mosi, Mpangi Branham?”

²³² Mu ke yufula muntu nyonso. . . Mu kele ntangu nyonso ya kukubama na muntu nyonso na kulakisa munu yina kele kieleka mpe luvunu, kasi ya fwana vwanda Ndinga. Bawu lenda tuba ve. . . Ya fwana katuka na Ndinga! Ya kele kuna kisika bidimbu yayi kuzibukaka. Mpe beno vwanda na boma ata fyoti ve, kana ya kele kidimbu ya ke tuba yawu mosi kubanda Genèse tii Apocalypse. Na yawu beno tala bidimbu. Beno zola Yandi ve?

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

²³³ Beto kulumusa yintu ya beto. Bantu yikwa na kati awa yina zaba Yandi ve mutindu Mvulusi ya beno, ke zola kubokila Yandi na kati ya ntima ya beno? Beno zaba, mu ke kwikilaka na kukwenda na autel, kieleka mu ke kwikila yawu. Ya kele mbote. Kasi na kati ya Biblia bawu kwendaka ve na autel samu na kuzwa mpulusu, bawu kwikilaka kaka Yawu na ntima ya bawu mpe ndimaka Yawu. Bantu yikwa na kati ya beno ke zola kwiza na mutindu ya Biblia, “Bayina nyonso kwikilaka kuzwaka mbotika”? Bantu yikwa ke kwikila bubu yayi, ata mbala mosi ve me salaka yawu ntete kasi beno zola kutuba na ntwala ya bantu ti beno vwandaka “yimbi” na banzila ya beno, mpe ti beno zola kundima Yesu mutindu Mvulusi ya beno? Beno zola kaka kutelemisa maboko ya beno na bayintu ya beno ya kukulumusa, kutuba, “Mu. . .”

234 Nzambi sakumuna nge. Nzambi sakumuna nge. Nzambi sakumuna nge. Nzambi sakumuna nge, nge. Nzambi sakumuna nge, kuna na manima. Nzambi sakumuna nge, nge. Nzambi sakumuna nge, kuna na manima. “Mu ke kwikila ntangu yayi.” Nzambi sakumuna nge. Nzambi sakumuna bakala na manima kuna. Ntangu yayi, beno bambuka moyo, *awa* ve kasi na kati ya ntima ya beno, na Nzambi, beno ke na kusala funguna na ntuala ya bantu, “Mfumu, mu zaba ti beto me kuma na ntangu ya nsuka. Mu me suka.”

235 Kilumbu yankaka yina mu vwandaka solula na mwa nkundi ya munu awa na mbanza, Dokotolo Sam Adair. Beto vwandaka ya kuvwanda na bilo. Mu tubaka, “Sam, mu kele na mwa mupepe na kati.”

Yandi tubaka, “Wapi mutindu nge me zaba ti ya kele mupepe? Ya kele na ziunga ya ntima ya nge?”

Mpe mu tubaka, “Yinga.”

236 Yandi tubaka, “Ya lenda vwanda kaka thrombose ya ntima—ntima—ya ntima—mpasi ya ntima—mpasi ya ntima.” Yandi tubaka. . . (Beno lemvokila munu.) Yandi tubaka, “Ya lenda vwanda mpasi na ntima.”

237 Mu Mtubaka, “Ntangu yayi, wapi mutindu nge me zaba ti ya kele kuna?” Yandi tubaka, “Bika mu tala nge.”

Yandi salaka munu bakizama, yandi tubaka, “Ve, ya kele ve na kima ya yimbi na nge.”

238 Mu tubaka, “Sam, ata ntangu ya ke kwiza. . .” Mu kele na bamvula makumi tanu na zole, mpe Sam kele mwa ya kukula mingi na munu. Mu tubaka, “Ntangu ya ke kwiza, Sam, bamvula makumi tatu nyonso yayi mu me kota na kumeka kunata bantu na kukwikila na Yesu Klisto, mpe Yandi yina mu zola mpe me sadila ntangu nyonso yayi; ya ke sala ata luswaswanu ve na munu ntangu Yandi ke kwiza, mu ke kwenda na Yinzo.”

239 Yandi tubaka, “Billy, nge zaba, kisika mu ke kuzwaka ya munu ya nene? Ya kele na kusalaka kima samu na muntu yankaka.”

Mu tubaka, “Ya kele luzingu ya kieleka.”

240 Kana beno kele na difwa awa na yinza yayi, nkundi, ya ke difwa yina ke beba. Kasi beto ke kuzwa difwa yina ke luta ve. Mwana yina kwendaka mpe bikaka difwa ya yandi, mpe yandi bakaka ndambu ya yawu na yandi. Ntangu yandi vutukaka, difwa ya yandi—difwa ya yandi kuvwenzamaka. Kasi kana beno kwenda ntama na ya beno, ya kele ve mutindu yina na Kimfumu ya Nzambi, beto me kuzwa difwa yina ke bebaka ve. Beno zola ve kuzwa Yawu? Ya kele na bantu pene kumi na tanu me telemisa maboko ya bawu, misumuki yina me zola kuzwa difwa ya bawu na suka yayi. Ya lenda vwanda na mosi dyaka ntete beto sambila? Yinga.

Kieleka na malembe ntangu yayi:

Mu zola Yandi, mu . . .

Beno baka lukanu ya beno ntangu yayi. Kana beno ke kuwa ti beno fwana, yayi ke vwanda ntangu.

Samu Yandi zolaka munu ntete

Mpe futaka mpulusu ya munu

Na . . . (Nzambi sakumuna nge. Nzambi sakumuna nge . . . ? . . .)

²⁴¹ Tata ya Mazulu, na mutindu ya swi ya ntangu yayi, beto ke nata na Nge nkonga ya bantu yayi, na yisi ya nkadulu ya kulemba na suka yayi, Mfumu, na kumekaka na kunata Nsangu na bantu yayi samu ti mu zola bawu. Mu zola ti bawu kuwa Yawu, Mfumu. Mu zola ti bawu kuvwanda ya kukangama. Mu zola bawu kuzaba ti bima nyonso yayi yina me salama na bamvula fyoti me luta me vwanda kaka ve siansi, ya me vwanda Nge, Mfumu. Ya me vwanda Nge yina vwandaka zibula bima yayi. Mpe, O Nzambi, beto nyonso ke na kuwa ti kaka na ntwala ya beto kele na Jubiléé ya nene.

²⁴² Mu ke sambila samu na bayina me telemisa maboko ya bawu. Ba zaba ti bawu kele yimbi, Mfumu. Mwa bima mingi . . . Ya lendaka vwanda ti bawu ke byadilaka bantangu yankaka mwa mbongo na muntu, kasi yinki ya salaka? Bawu zaba ve kisika ya me kwenda, ya me bikana kaka mwa fyoti, samu ti ya kele difwa yina ke beba. Mpe kana bawu bika yawu samu na muntu yankaka, ya ke beba dyaka.

²⁴³ Kasi beto kele na difwa ke bebaka ve, ya kele, kuvuuka, mpulusu, kuvutuka dyaka na disamba ya Eden. Banza na yawu, Mfumu, nani ke zola ve kuvutuka mutindu Adam mpe Eve mpe kuzinga kuna? Madya ya beto ya kukubika konso kilumbu; Tata ya Mazulu ntangu nyonso ke zonza na beto; kumona Nsemu ya nene yina kutambula na ntwala ya beto. Nkosi mpe kibulu kudya kintwadi, ngombe ke kudya matiti, nkosi ke kudya na yandi; na yina ntangu yayi bawu ke kudya mosi na yankaka, to nkosi ke kudyaka ngombe, mpe kibulu ke kudyaka ngombe, nyonso yina yandi lenda kudya. Kasi bilumbu yina ya ke vwanda ve mutindu yina. Bandeke ya nene ya kitoko ke pumbuka. Ya ke vwanda na ata mawa ve. Ya ke vwanda dyaka ve na ndilu ti beto me luta bivuvu ya beto. Kuna na nzila beto ke mona bana ya beto, baya beto ya luzolo. O Nzambi, wapi kilumbu! Wapi kilumbu! Ata yina beto ke kuzwa awa na zulu ya ntoto, ya—ya ke—ya ke zimbana nyonso, kasi Yawu ke zimbana ve.

²⁴⁴ Nzambi, ya lendaka vwanda ti mu ke kuzwa dyaka ve lenda ya kuzonza na bantu yayi yina me telemisa maboko ya bawu, awa na zulu ya ntoto yayi. Mu zaba ve. Mu banza ti mu ke kuzwa. Kasi kana mu kuzwa ve, na yina, Mfumu, ti mu kutana na bawu kuna na nzila. Ba lendaka tuba kima mutindu yayi, “Mpangi Branham, nge ke bambuka moyo na zulu ya ntoto ntete

ti dyambu yayi ya nene kusalama, suka mosi nge vwandaka zonzila na kuzibuka ya bidimbu yina ba bumbaka na Vaze ya ntoto? Ya vwandaka na ntangu yina ti Yandi kwizaka na vaze ya munu ya ntoto, mu vwandaka muntu yina telemisaka diboko ya munu na suka yina. Oh, mu kele na kyese ti mu vwandaka kuna.”

245 Mu ke tuba, “Mpangi ya bakala, mpangi ya kento, mu kele na kyese ti mu vwandaka kuna, mpe. Ntangu yayi beto ke bundana kintwadi na nzila ya bansungi nyonso.”

246 Sakumuna bawu, Tata, ba kele ya Nge. Nge tubaka, “Muntu ve lenda kwiza na Munu kana ti Tata kubenda yandi. Mpe nyonso yina Tata pesaka Munu ke kwiza, ata mosi ve ya bawu ke zimbana.” Na yawu beto—beto ke vutula matondo, Tata, samu na yawu. Bika ti bawu kwiza ntangu yayi mpe kuzwa lufutu ya mpulusu ya bawu, ve kukuma ya dibuundu mosi. Kasi lufutu kele ve kukuma ya dibuundu mosi kasi Mbutukulu ya malu-malu, samu na kuzwa Mpeve-Santu. Ti bawu kuzwa Nge, Tata. Samu ti beto me pesa yawu na maboko ya Nge, na Nkumbu ya Yesu Klisto. Amen.

247 Samu na bamuswale yayi: Mfumu Yesu, mu ke sambila samu na bamuswale yayi; mpe ke lomba ti Nge ke sakumuna bayina nyonso kele na nsatu, bayina nyonso kele awa, Mfumu, kento ya mputu yayi ya kuvwanda awa na kiti ya bambevo.

248 Na manima ya lukutakanu ya nene yayi na suka yayi, Tata, na kuwaka Mpeve-Santu ya Nge nyonso ya kufuluka na beto, kuwa Ndinga kukulumuka ya mudindu mpe kukotisa misisa na kati ya bantima ya bantu. Ata mbala mosi ve ti ba ke zimbana yawu, Mfumu. Ntangu nyonso ntangu bawu ke kuwa bima yayi bawu ke banza na bidimbu yayi zibukaka. Ntangu yayi, sadisa beto na kuzaba yina vwandaka bidimbu yina, Mfumu, samu ti mosi na mosi kuvwanda ve na poto-poto na mabanza ya yandi, kasi yandi ke zaba na “MUTINDU ME TUBA MFUMU” ti ya kele kidimbu ya Nzambi, bidimbu yina Nzambi me zibula samu na beto.

249 Beto ke sambila ti Nge belusa bambevo nyonso mpe bantu yina kele na mpasi. Pesa yawu, Mfumu. Mpeve ya Nge kele awa. Kana Nge lenda vulusa musumuki na manima ya kivinga, Nge lenda belusa mpe, muntu ya kubela kuna. Mu ke sambila ti Nge pesa yawu, Mfumu, mpe belusa bayina nyonso bamuswale yayi ke monikisa ti lendaka ve kukuma awa bubu yayi. Beto ke pesa yawu nyonso na Nge na Nkumbu ya Mfumu Yesu Klisto. Amen.

250 Mu banza ti bawu kele na mwa bebe yina zola lusakumunu. Kento yina kele awa na mwana ya bebe? Yandi zola kunata yandi na ntangu yayi? Beto ke sepela na kusakumuna mwa bebe yina. Ve, ya fwana vwanda kaka mwa mwana ve, beno kwiza kaka. (Ndambu ya bakuluntu beno kwiza telama na munu kana beno zola na ntangu yayi.) Bamvula yikwa? Bamvula zole na ndambu. Yinki kele nkumbu ya yandi? Scott? Scott Ford, mwa Scott Ford,

ya bamvula yiya mpe ndambu, zola kusakumukwa na suka yayi na Mfumu mpe Mvulusi ya yandi, Yesu Klisto. Mama ya yandi me nata yandi. (Belama, mpangi ya bakala, kwiza na ntwala.)

²⁵¹ Mfumu ya lemvo, beto ke nata na Nge mwa bebe yayi na suka yayi, na mutindu ya lusakumunu. Beto me tentika maboko ya beto na zulu ya mwa bebe, mwa mwana ya bakala yayi, mpe kulomba ti ngolo yina vumbulaka Yesu na ntoni ke pesa ngolo na mwa mwana ya bakala yayi. Nzambi, ti yandi kuzinga na mavimpi ya mbote mpe ngolo. Ti yandi kuzinga, Mfumu, samu na nkembo ya Nge. Mutindu Nge salaka yimeni na kusadisa bebe yayi, mpe beto ke tonda Nge samu na yawu. Mpe mu ke sambila ti Nge ke landila na kuvwanda na mwa mwana yayi. Vwanda na bibuti ya yandi, baya yandi ya luzolo. Ti . . . beto zaba mpe ba me longa ti bima nyonso ke salaka kintwadi samu na mambote ya bayina ke zolaka Mfumu. Mutindu bima yayi bantangu yankaka ke nata bantu pene-pene ya Nge. Mu ke sambila ti Nge ke pesa balusakumunu yina beto me lomba. Mpe ntangu yayi, Tata, na kutumamaka na Ndinga ya Nge, beto ke pesa mwa mwana ya bakala yayi na Nge na Nkumbu ya Yesu Klisto. Ti Nge kuzwa mwa mpeve ya yandi, moyo, mpe nzutu, mpe sadila yandi samu na nkembo ya Nge. Amen.

²⁵² Nzambi sakumuna nge, mpangi ya kento. Nzambi sakumuna nge, mwa Scott. Mutindu beto ke tonda Mfumu samu na yawu!

²⁵³ Ntangu yayi, nani ke baka mbotika? Ya kele na nkonga ya bantu yina ke kuzwa mbotika, mu banza. Na yina beto ke kubama samu na yawu, beto yimba . . . Mu ke tuba na beno yina beto lenda sala, beto yimba . . . Mu ke bika Mpangi Neville kusala yawu. Mu zaba ti ya ke vwanda mbote na ntangu yina. Mbote mingi, tata, Mpangi Neville.

²⁵⁴ Beno zola Mfumu, beno tuba “Amen.” [Dibuundu me tuba, “Amen.”—Mu.] Beno ke sambila samu na munu? [Dibuundu me tuba, “Amen.”] Amen. Amen.



APOCALYPSE, KAPU YA TANU KITINI YA II KNG61-0618
(Revelation, Chapter Five Part II)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 18 ya Ngonda ya sambanu, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org